

بِسْمِ اللَّهِ الرَّحْمَنِ الرَّحِيمِ

المداولة بعد الحكم أحياناً

روياً مسرحية

في

ثلاث مداولات

تأليف

ممدوح فهمي

المداولة الأولى

الدفاع الأخير

المنظر

((يلاحظ أن الديكورات في هذه المسرحية لها تنسيق خاص يساعد علي طريقة صياغة العرض من وجهة نظر المتهم فالحدث المسرحي ينتقل من ديكور الي آخر دون توقف لإعتماد المسرحيه علي التتابع السريع ، وعلي ما تقدم فان الديكورات متناثرة علي خشبة المسرح ويرتبط كل منها مع " سبوت لايت " خاص بها ليضئ في الوقت المناسب مع كل حدث ، ويترك هنا للسيد المخرج مع مصمم الديكور إعداد الديكورات الرمزية المناسبة للموقف وفي الاماكن المناسبة للحركة والديكورات معاً :

- منصة قضاء مع قفص الاتهام •
- مائدة طعام صغيره •
- مكتب للتحقيق •
- أريكة من صالون •
- زنزانه للسجن •
- طاولة في المحل التجاري •

ويبقى أخيراً أن نشير إلي أن ملابس المتهم لا تتغير طوال العرض المسرحي وهي ملابس الإعدام ، أما ملابس الشخصيات الأخرى فانها تتغير لتناسب المواقف والأحداث ، وأيضاً فإن النص المسرحي سيقصر فيما بعد علي ذكر المكان والحوار والشخصيات فقط)) •

المشهد الأول :المحكمة

(يسلم الضوء علي منصة القضاء الخالية تماماً من القاضي
ومن المستشارين وهناك في قفص الاتهام يقف (صلاح) المتهم
وهو يتطلع الي منصة القضاء الخالية) .

حكمت المحكمة حضورياً بإحالة أوراق المتهم صلاح الدين فتوح
الي فضيلة المفتي . .

(صارخاً) لا . .

رفعت الجلسة . .

(أصوات تصفيق حاد وكذلك تصفير الاعجاب ويتحول هذا
الخليط المزعج بعد ذلك الي شكل منظم من التصفيق والتهتاف
كما يحدث في مباريات كرة القدم) . .

هو . . هو . . إعداموه . . هو . . هو . . اسنقوه . .

(يبتعد الصوت أخيراً ويتلاشى) . .

(عيون المتهم صلاح تتابع هذه الاصوات في حركة " بانتونيم
" وكأنهم يتجهون نحو الجمهور) . .

اسمعوني من فضلكم . .

انت قلت كل حاجه . .

(وهو يلتفت نحو المنصة في حده) طيب ليه مش عاوزين
تصدقوني ؟ . .

الجريمه ثابتة عليك . . كل الأدله والشهود وتقرير الطبيب
الشرعي أثبتوا انك قتلت الحاج مختار . .

حد يقتل أبوه !! . .

انت اللي بتسألنا ؟ . .

أنا من حقي أدافع عن نفسي . .

الأدله أكبر من دفاعك . .

لا . . أنا لايمكن اكون قاتل . . ولو كنت قاتل لا يمكن أقتل الحاج

مختار . . انتوا لو تعرفوا ايه معني الحاج مختار بالنسبه لي . .

استحاله حد فيكم يشك لحظه في اني قتلته . . مستحيل اقتله . .

مستحيل . .

ص / القاضي

صلاح

ص / القاضي

مؤثرات

ص / المجاميع

صلاح

ص / القاضي

صلاح

ص / القاضي

صلاح

ص / القاضي

صلاح

ص / القاضي

صلاح

اظلام وانتقال بالضوء للمشهد الثاني

غرفة الطعام

- (سلوى ابنة القتيل مختار تطالع جريدة الصباح وهي تجلس الي مائده الافطار حيث يجلس مختار " الأب القتيل " كما تجلس الأم بجانبه وتبدو عليهم جميعاً السعادة) ..
- ماتاكلي ياسلوى .. مختار
- أخيراً مسكوه .. سلوى
- (وهي تنظر الي الحاج مختار في تعجب) مين اللي مسكوه ده
- ياحاج ؟ .. الأم
- المتهم .. سلوى
- متهم مين ؟ .. الأم
- اللي قتل الراجل .. سلوى
- راجل مين وست مين .. ما تسبيك من البلاوى دى وتفطرى .. الأم
- استنى بس يأم سلوى .. دى قصدها علي التاجر اللي انقتل من شهرين .. مختار
- بالظبط بابابا .. اسمع كده .. (تقرأ) ورغم اختفاء القاتل طوال هذه المدة إلا أن البوليس كان يتتبع أثره في كل الأماكن التي يحتمل أن يكون وكرأ له .. وبالفعل تم القبض عليه في إحدى الملاهي الليلية بصحبه الراقصه (ن . ع) .. سلوى
- ينيلها (ن . ع) دى .. ومالقتش غير قتال القتله ده وتحبه ؟ .. الأم
- تحب مين يأم سلوى .. دى بتحب القرشين اللي سرقهم .. مختار
- إياك بقي يكونوا مسكوها هي كمان .. الأم
- لا .. دول أخلوا سبيلها بعد التحقيق .. لأنها بحكم القانون شاهده فضينا من الكلام ده واطلعي شوفي صلاح اتأخر ليه .. سلوى
- (تبدو عليها السعادة وهي تطوى الجرنال وتلقي به في حركه سريعة ماضية للخارج) حالاً هاجيبه لو حتي بالبوليس .. سلوى
- (بعد خروج سلوى تماماً) باقول ايه يامختار .. الأم
- خير .. مختار
- انت صحيح عقدت العزم علي انك تجوز سلوى لصلاح ؟ .. الأم
- ما الكلام ده انتهيينا منه من زمان .. مختار
- هو صحيح ابن حلال .. وبقي زى ابننا .. بس يعني .. الأم
- بس يعني ايه ؟ .. هي الحكايبه لما دخلت في الجد هانبدأ نفكر من جديد ؟ .. مختار
- ياحاج انت عارف ان الناس مابترحمش .. الأم
- يعني لا هايبقي رحمه من الدنيا .. ولا رحمه من الناس .. مختار

- عاوز انا احنا كمان نعاقبه علي اللي حصله .. موش ده الطفل
المسكين اللي لاقيناه نايه في الشارع ويوميها قعدتني تبكي وقلتي
انه هايكون ابنك البكرى لو مظهر لوش أهل يسألوا عليه ..
موش ده اللي جالنا وجاب معاه الخير وربنا رزقنا علي وشه ..
موش ده اللي عشتى طول عمرك تقولي ياريت اشوفه راجل
وأخطب له وأجوزه وأفرح بيه .. قوليلي ايه اللي اتغير .. قوليلي
قوليني انت يا حاج أنا قلت ايه أستاهل عليه التقطيم ده كله ؟ .. انت
يعني هتحبه قد انا ما حبيته .. ده انا اللي سهرت بيه الليالي
وشلت همه من يوم ما دخل البيت .. أنا ولا موش انا ..
امال ليه بتقولي الكلام ده دلوقت ؟ ..
الخوف ..
الخوف ؟ ..
- أيوه الخوف .. الخوف علي بنتنا الوحيده .. والخوف عليه هو
كمان .. موش جايز بييجي يوم وكلام الناس يضيع المحبه اللي
بينهم والود ويرجع اخوك عند ابوك وكل حي يروح لحاله ..
لا صلاح ولا سلوى حد فيهم هايسمع غير اللي في قلبه .. الايام
اللي فاتت أكدت انهم متفاهمين ومش ناقصهم حاجه لسه
هايعرفوها حتي أو يتفاجأوا بيها .. كده ولا موش كده ؟ ..
كده ..
- يبقي ايه اللي مخوفك من جوازهم ؟ ..
(في استسلام) ولا حاجه ..
- لا .. كلام فض المجالس ده انا ماحبوش .. سلى زى ما هي بنتك
بنتي انا كمان .. ولازم اسمع اللي في قلبك وموغوشك ..
(بنفس الطريقه السابقه) مشيها ..
من قلبك ..
- من قلبي .. انا بس زى ماتقول كده كنت بجسك .. ان جيت
للحق البنت بتحبه قوى وهما الاتنين لايقين لبعضيههم ..
يبقي نتجه لربنا ونقول ألف مبروك) ..
- (صلاح يدخل في صحبه سلوى وهي تمسك بيده ويبدو عليهما
منتهي السعاده) ..
- صباح الخير يابابا .. صباح الخير ياماما .. ازيكم النهارده ..
عال .. بس أم سلوى زعلانه منك وواخده علي خاطرها ..
(الأم تنظر لمختار في قلق وهي تمسك بيد صلاح لتجلسه
بجوارها في الوقت الذي يقوم فيه صلاح بتقبيل يدها) ..
- قال ايه ياسيدى بتقول انك بقيت تتقل علينا وموش عاوز تنزل
تفطر معانا بدرى زى زمان ..
- معقوله ياماما .. اللي حصل اني اتأخرت في النوم النهارده لاني

- كنت سهران أذاكر ..
 أيوه ياعم .. عاوز تبقي معيد عليه ..
 ياريت .. علشان ماخليكش تخرجي من البيت نهائي وذاكرلك
 كل حاجه هنا ..
- الأم
 مختار
 سلوى
 الأم
 مختار
- شفت الغيره يا حاج اللي علي اصولها ..
 قصدك ايه يأم سلوى .. يعني انتي شايفه اني ماباغيرش عليكِي؟
 (ضاحكه لصلاح) المعركه هاتبدأ ..
 لا معركه ولا خناقه ياستي .. احنا بقي فينا اللي يتغار عليه ..
 (في تردد) طيب ايه رأيك بقي اني باغير عليكِي وخصوصاً من
 الجدد ده (مختار يشير الي صلاح ويضحك الجميع في سعادته)
 معقول يا حاج ان ماما تحبني أكثر منك ..
 قوله يا ابني ..
 يعني أطمئن ..
- الأم
 مختار
 الأم
 مختار
- وتحط في بطنك بطيخه صيفي ..
 ماشي .. ياللا يا صلاح اعملك همه علشان تنزل معايا (يتوقف
 فجأه عن الحديث) إلا قولِي .. انت عندك جامعه النهارده ؟ ..
 جامعه ايه يا بابا .. حضرتك ناسي ان عندي مشوار للبنك عشان
 توريد النص مليون اللي ربنا كرمننا بيهم من بيعه أمبارح ..
 بعد ما تخلص تحبيني الكليه عشان تاخذني ..
 انتي مش رايحه بعربيتك ..
 لا ..
- الأم
 صلاح
 سلوى
 صلاح
 سلوى
 الأم
- أمال انا علمتك السواقه ليه ؟ ..
 ما انت عارف اني ماباعرفش أسوق في الزحمه ..
 لا يا صلاح يا ابني .. أعمل معروف خليك معاها شويه كمان ..
 احنا مش ناقصين اعمل معروف ..
 ده كلام .. ده أنا فداها وفداكي وفدا الحاج وفداكم كلكم .. هو انا
 لي حد غيركم في الوجود ..
 (مختار يستعد للخروج وسلوى تجمع بعض الكتب والام ترفع
 الصحون) ..
 الفلوس فين يا حاج ؟ ..
 أديله يام سلوى النص مليون اللي محطوطين في الدولاب ..
 سلام عليكم ..
- الأم
 صلاح
 مختار

إظلام تدريجى

المحكمة

(الضوء علي منصة القضاء الخاليه .. وصلاح يجلس في قفس الاتهام ساكناً) ..

ص/ المدعي

وهكذا استطاع المتهم أن يخطط لجريمته البشعة .. فلقد احتال أولاً علي قلوب ومشاعر هذه الأسرة المسكينه بحجه انه طفل ضال فقد أهله وزويه .. ولا يعرف له أصل ولا هويه .. والواقع ياساده أن التحريات التي أجريت حول ظروف وملابسات ظهور المتهم لهم قد أثبتت انه لقيط وانه كان في حضانه إحدى الملاجئ الخيرية وله ملف بها .. وقبل أن نفكر في نظرة إشفاق لمامضيه .. فإننا نشير الي انه وبرغم حداثة سنه حين التقى بالمجنني عليه الحاج مختار استطاع ان يؤثر فيه منذ البدايه .. بالله عليكم كيف لهذا الطفل أن يفكر الي تلك الحد من المراوغه والتضليل .. أليس هذا يؤكد وجود المجرم في داخله منذ البدايه ومنذ نعومة أظافره ..

ايه رأيك في الكلام ده انت فعلاً ..

ص/ القاضي

(صلاح يشير بيده نحو المنصه كأنه يوقف القاضي عن الاسترسال) ..

(موافقاً) كل اللي اتقال صحيح ..

صلاح

(صارخاً) أرجو من عداله المحكمه سؤال المتهم عن سر إنكاره لمامضيه لان ذلك في صميم الدعوى المقامه ضده ..

ص/ المدعي

المتهم ممكن يوضح الأسباب ؟ ..

ص/ القاضي

(صلاح يتوجه بوجهه ناحيه الجمهور ثم يجلس في مراره) ..

هناك .. لما كنت في الملجأ .. كان فيه تجاوز لكل تصرف باعمله .. حتي لما كنت باكدب كانوا بيوهموني انهم مصدقني .. كانت نظرتهم لي ولغيري من الاطفال اللي زيي .. نظرة عطف لطفل مسكين كل ذنبه انه نزل ضيف من بطن واحده مايعرفهاش .. ولمده تسع شهور كاملين .. ياتري كان ضيف عزيز ولا سخييف ؟ .. موش عارف .. لكن اللي اعرفه اننا في النهايه افترقنا علي باب جامع .. (فجأة ينهض صلاح ويتجه بالحديث نحو منصة القضاء في حده) .. تصور ياحضرة القاضي .. تصور اني كنت بانادى الداده في الملجأ واقولها ياماما .. وأنادى المشرفه كمان واقولها ياماما .. كانوا بيردوا علي ويقولولي نعم يا حبيبي .. وساعات يا ضنايا .. بالرغم من اني كنت باكدب عليهم في الكلمه دي .. وبالرغم من انهم قالولي

صلاح

ان اللي بيكذب بيروح النار .. أيامها مكنتش اعرف النار ..
بس مش عارف ليه كنت باخاف منها .. باخاف منها لغاية ما
عرفتها .. (يتوقف لحظه) .. النار هنا يا حضرات .. النار
في العالم الكبير ده .. العالم الصغير هناك ما فيهوش نار .. فيه
ان الطفل لو بكى يلاقي اللي يمسح دموعه .. لو قال جعان يلاقي
اللي يطعمه .. لو قال أشرب يلاقي اللي يسقيه .. لو قال تعبت
يلاقي اللي يشيله .. لكن هنا .. لو فتح بقة يداس بدور رحمه
.. والناس تجرى فوقه علشان تلحق معادها .. حتي لو كان
ميعاد لسرقه أو سهره حمرا أو اتفاق علي قتل قتيل ..

إظلام تدريجي

وارتاح مع مين ؟ ..	سلوی
(بعد محاوله تسمع لما يقوله صلاح) .. بتقول ايه .. سمعني	صلاح
باقول اني مش ممكن اكذب عليكى ابدأ .. والايام حاتشهد بكده	
(صلاح يجمع كتبه بعد ان ينظر لساعته ويستعد للخروج)	
علي فين ؟ ..	سلوی
ماحاول انام شويه عشان بكره عندي شغل .. تصبجي علي خير	صلاح
(سلوی تشير له بالتحية وهو يختفي بعيداً) ..	

إظلام تدريجي

المحكمة

(المنصه خاليه أيضاً وصلاح يجلس في استرخاء خلف القفص
الحديدي غير مبالياً بما يقال فهو في حالة تفكير عميق) ..
لم يمنعه العلم الذي كان ثمرة من ثمار عطف المجني عليه
ومساندته الدائمة له .. لقد أنفق عليه من مال كأنه أحد أبنائه ..
بل لقد وضعه في مرتبة ابنه الثاني لابنته الوحيدة سلوى ..
سلوى تلك المسكينه التي تعلقت به وكانت تبادلته الثقة رغم كل ما
كان يقدمه من أكاذيب مسمومه نحو غد يجمع بينهما في عش
زوجيه لم يقدر له ان يكون .. وأما هذه الزوجه البائسه فقد قدمت
له كل الحنان وكل الحب .. ولم يكتفي بأن يسلبها كل ما كان
بقلبها الكبير من عاطفة إنسانية نحوه بل تطاولت يده لتسلبها رفيق
عمرها وعماد حياتها .. الحاج مختار القليل ..
(مزج صوتي للأم في نهاية حديث المدعي للحديث الذي سيتم
بينها وبين صلاح الذي مازال شاردأ مع أفكاره مع تركيز الضوء
عليه) ..

ص / المدعي

ايه ده كله ياصلاح .. امال انت بتصرف ايه يا حبيبي علي نفسك
عارفه ياماما .. نفسي اللي باحوشه معاك ده يوصل لمليون جنيه
مليون جنيه مره واحده ؟ ..
ويبقوا شويه كمان علي مهر سلوى ..
تعيش يا ابني .. انت عندنا تسوى ملايين .. بس انت شد حيلك
كده وخذ الليسانس بتاعك وساعتها كل حاجه هاتتحل ..
(صلاح يضحك في الفلاش باك في سخرية ويضع صوته في
فراغ عميق) ..

ص / الأم
ص / صلاح
ص / الأم
ص / صلاح
ص / الأم

إفلام تدريجي

غرفة التحقيق

- (يجلس وكيل النيابة وأمامه يقف صلاح في هدوء كامل ويبدو عليه الاستسلام كما تقف الأم بملابس الحداد في مواجهه وكيل النيابة الذي يقلب في بعض الأوراق ثم يوجه حديثه لهما) ..
المتهم يا حاجه في اقواله بيقول انه كان محل ثقه المرحوم وثقتك انتي كمان ..
كان ..
بيقول كمان ان المبلغ اللي اتسرق كان فيه اكثر منه بكثير تحت ايده في يوم من الايام .. الكلام ده صحيح ؟ ..
احتمال ..
حضرتك كنتي بتستلمي منه فلوس المحل بين وقت والتاني ؟ ..
ساعات ..
كان أكبر مبلغ استلمتية منه قد ايه ؟ ..
٧٥٠ ألف ..
والمبلغ المسروق كام بالضبط ؟ ..
خمسين الف ..
ايه رأيك في الملاحظه دي .. مالفنتش نظرك لحاجه ؟ ..
أنا باتهمه انه هو اللي قتل جوزي .. وهو ده كل اللي عندي ..
طيب اتفضلي امضى هنا ..
(وكيل النيابة يقدم الاوراق الي الام التي تتوقف وتنظر الي صلاح الذي ينظر لها في مراره) ..
الختم بتاعي معاه .. ولو سمحت أثبت ده في المحضر .. لانه جازي يكون عمل بيه حاجه من ورايا لاجل ما يضيعني أنا والبنيت (وهو يقدم الختامه للأم لأخذ بصمة يدها) هاثبت كل حاجه ..
ابصمى هنا لو سمحتي ..
(بعد ان تقوم بوضع بصمه اصبعها وللمحقق) مطلوب مني شئ تاني ؟ ..
لأ .. اتفضلي ..
(تخرج الام وهي تنظر لصلاح شذراً وتختفي تماماً) ..
(بعد ان ينظر لصلاح لحظه) دي أول واحده طلبت أقوالها كشاهده نفي .. نشوف التانيه .. (ينادي) .. الشاهد التاني باعسكري ..
(تتقدم سيده نراها للمره الأولى في ملابس وقوره وهي مديرة الملجأ وتدخل وهي تنظر الي صلاح نظرة إشفاق ويبادلها صلاح

وكيل النيابة

الأم

وكيل النيابة

وكيل النيابة

نفس النظره ثم يندفع نحوها ليقبل يدها ويلقي برأسه علي كتفها وهي تربت عليه في حنان وتنظر الي وكيل النيابة وهي تهز رأسها بنفي كل ما تراه أمامها) . .

وكيل النيابة

اتفضلي استريحي يامدام إحسان . .
(صلاح يساعد إحسان علي الجلوس في مكانه الذي أصبح الأقرب لها ثم يجلس القرفصاء بجانبها) . .

وكيل النيابة

هو ده صلاح اللي كان عندك في الملجأ ؟ . .
هو . . بس للأسف كبير . . كبير كتير . .

إحسان

المتهم يقول انك كنتي دايماً يتشهيده بانمه مثال للأمانه والشرف صلاح عمره ما غلط غلطه زى دى . . عمره . .

وكيل النيابة

إحسان

وهو كان فيه قدامه خمسين ألف وما عملهاش . . المتهم بيحكي عن واقعه حصلت وشايف انها ممكن تساعده . . هل صحيح ان المجني عليه كان علي علم بان صلاح كان نزيل عندكم في الملجأ؟ في يوم . . ومن حوالي خمس سنين . . صلاح جه زارني وكان معاه راجل محترم . . بومها قاللي ان الراجل ده هو اللي عايش عنده وبيعتبر متبنيه . . الراجل ده يوميا اتبرع للملجأ بمبلغ ميت ألف جنيه . . فاكراه كويس . .

وكيل النيابة

إحسان

الراجل ده هو المجني عليه واللى صلاح متهم بقتله . . ده لو كان عملها تبقي أكبر غلطه غلطها في حياته . . غلطه لا يمكن أبداً تغتفر . .

وكيل النيابة

إحسان

(صلاح ينهض فجأه ليواجه إحسان في اعتراض في الوقت الذي تنظر فيه إحسان لصلاح نظرة عتاب) . .

(رافضاً) . . حضرتك تتصورى اني ممكن أقتل . . أنا أقتل ياماما إحسان ؟ . . أنا ؟ . .

صلاح

أكيد فيه ايصال متحرر بالمبلغ اللي أخذتية من الحاج مختار . . طبعاً . .

وكيل النيابة

إحسان

ممكن تجيبنا صورته من كعب الايصال ؟ . .

وكيل النيابة

إحسان

(في انفعال) . . النصيبه ان الكعب موجود . . بس للأسف مكتوب في خانة المورد فاعل خير . . موش عارفه ليه ظروفك جت كده ياصلاح . . موش عارفه . . (وتبكي) . .

وكيل النيابة

اتفضلي يامدام . .
(صلاح يمسك بيدها في وداع حزين حيث تخرج من المسرح تماماً) . .

وكيل النيابة

الشاهد الثالث يدخل . .

(تدخل سلوى بملابس الحداد ومازال صلاح في آلامه من الموقف السابق) . .

وكيل النيابة

الآنسه سلوى بنت المرحوم الحاج مختار . .

- أبوه .. سلوى
- (وكيل النيابة يشير لها بالجلوس حيث تجلس وهي تنظر الي صلاح في ضيق في الوقت الذي يجلس فيه صلاح دون أى انفعال ملحوظ بالنسبه لها) ..
- المتهم في أقواله بيقول ان علاقته بيكي تؤكد عدم وجود أى سوء نيه بالنسبه لك علي الأقل .. وكيل النيابة
- مافيش أى علاقه بيني وبينه علشان يقول حاجه زى كده .. سلوى
- يعني مكانش فيه مشروع جواز ؟ .. وكيل النيابة
- موش لما يكون فيه تكافؤ اجتماعي بين الزوج والزوجه أولاً .. سلوى
- كمان بيقول ان موافقه معاكي تؤكد نبل العلاقه اللي كانت بتربطه بالاسره وانك شاهده نفي هيستعين بيه في الدفاع .. وكيل النيابة
- (سلوى تمسح بعض الدموع التي فاضت من عيناها .. لكنها سرعان ما تعتدل في جلستها وترمق صلاح بنظرة إحتقار وشماته) ..
- ياافندم كل اللي بيقوله في نظري مجرد قشه بيحاول يتعلق بيها أى غريق .. مش معقول ان قاتل يحب ويخلص لبنات ضحيته في يوم من الايام .. عمليه مستحيله طبعاً ..
- طيب تفتكرى انه حب يطلعك مره علي سر معين وهو متردد وقلقان .. هو ذكر انه لمحكك بحاجه زى كده .. وكيل النيابة
- ماافتكرش .. وماحصلش .. ده كذاب .. سلوى

إظلام تدريجي

المحكمة

(منصة القضاء خاليه أيضاً ويقف صلاح خلف القفص ووجهه في اتجاه المدعي الذي لا نراه الآن) ..

وحاول المتهم ان ينهي هذا الدور التمثيلي في المكان والزمان اللذان حددهما لكن الظروف تشاء أن ينكشف سره في اللحظة المناسبة ليكون صيداً سهلاً المنال كما كانت فريسته المرحوم مختار ..

(صارخاً) .. انا ماقتلتش ..

أمال مين اللي قتل ؟ ..

ماشفتش ..

المبلغ ودينه فين ؟ ..

صدقوني انا ماقتلتش .. وماسرقنتش حاجه ..

والأدله .. والشهود .. وتقرير الطب الشرعي ..

معقول الظروف وسوء الحظ يبقوا هم الأدله والشهود .. انا

ماقتلتش .. ماقتلتش ..

من أدعي خلاف الظاهر عليه عبء الإثبات .. وانت دلوقت

متهم .. وفيه جريمه .. وفيه دليل .. وفيه شاهد موجود ..

يبقي ايه اللي ناقص .. الحكم ياصلاح ..

ص / المدعي

صلاح

ص / القاضي

صلاح

ص / القاضي

صلاح

ص / القاضي

صلاح

ص / القاضي

إظلام تدريجي

(الجندي يصبو مسدسه صوب صلاح الذي لا يصدق ما يحدث)

إظلام تدريجي

المحكمة

(منصة القضاء خالية أيضاً .. وصلاح يجلس خلف القفص وهو يخفي وجهه وما زال يعايش نهاية المشهد السابق) ..
وهكذا أيها الساده ينتهي بنا الأمر الي كيفية وقوع تلك الجريمة الشنعاء .. هكذا وقد اتضحت كل أبعادها ودوافعها .. والآن .. هل يترك القانون أمثال هذا المتهم الذى جاء من وسط غابات الخطينه ليشكل خطيئة أخرى بين جنبات هذا المجتمع الطاهر ؟ .. هل سترك دون عقوبه رادعه لأمثاله ؟ .. انني حين أطلب هنا بالقلصاص منه فانني أشدد علي ضرورة الحكم بالاعدام له وهذا أقل ما يريح صدر المجتمع وصدر تلك الأسرة المنكوبه .. وشكراً ..

ص/ المدعي

الدفاع عن المتهم يفضل ..

ص/ القاضي

(من بين الجمهور بالصاله يتقدم الحاج مختار في ملابس الدفاع .. صلاح ينظر الي مختار ولا تبدو عليه الدهشه لكونه دفاعه بل انه ينظر له نظرة المتهم الي من يدافع عنه .. ويصعد مختار الي المسرح ليوجه حديثه الي الجمهور) ..

مختار

حضرات الساده والسيدات .. انني هنا لست بوصفي محام عن المتهم .. بل جئت شاهداً علي ما حدث لانني كنت هناك كما رأيتم .. لذا سأورد لحضراتكم بعض الحقائق التي رأيتموها .. عسى ان يكون فيها دفوعه وبراءته .. أولاً : سمع الشرطي المكلف بالحراسه لفظاً مني لحظه الموت وهو كلمه (لا .. لا ياصلاح) قلتها عالياً .. قلتها مستنجداً به لست مستنجداً منه كما قال رجل الأمن .. ثانياً : ما الذى كان يدعو المتهم للوقوف بجانب جثتي في الفتره ما بين وقوع الجريمة وحضور الشرطي ؟ .. وهنا اسمحوا لي أن أعود الي ما سبق ان ذكره الشرطي من انه كان علي بعد نصف كيلو من مكان الجريمة .. لو ان المتهم قد ابتعد عن مكانها وبنفس السرعة التي وصل بها الشرطي .. فهل كانا سيلتقيان أمام جثتي كما رأيتم ؟ .. ثالثاً : جاء في أقوال السيده مديرة الملجأ الخيري ان المتهم قد اصطحب معه رجل في حكم المتبني له .. ولقد دفع هذا الرجل مبلغ مائة ألف جنيه تبرعاً منه للدار .. ودعونا نتساءل بعيداً وبغض النظر عن اقوال مديرة الملجأ .. نتساءل : هل كان المتهم يعد لجريمه ستقع بعد خمس سنوات ؟ .. ونتساءل أيضاً : هل كان المتهم يسمح لهذا المحسن أو فاعل الخير أن يتبرع بمائة ألف جنيه إمعاناً منه في التخطيط

لجريمته ؟ .. ثم نتساءل أخيراً : وما الفائدة من هذا كله حين وقع في قبضة العدالة الآن ؟ .. رابعاً وأخيراً : جاء في التحقيق ان المتهم كان سيتزوج من ابنتي وهذا ما ورد في أقوال متضاربه بيني وبينها وبين زوجتي .. ونحن هنا نلتمس لهما العذر فلقد هالهما ما حدث لي من جراء تلك الجريمة البشعة .. لقد كان المتهم بالفعل سيتزوج من سلوى وهي الابنه الوحيده لي والوريثه الشرعية أيضاً .. أى أن هناك أضعاف هذا المبلغ كان سيأتي اليه دون ان تراق قطرة دم واحده .. وكان سيصبح – لو كنت علي قيد الحياة – شريكاً كاملاً لي حسب ما جاء في أقوال زوجتي من انه كان محل ثقتي وثقتها والتي كانت بلا حدود .. سادتي .. الكل هنا قد نعت المتهم وقال انه ابن خطيئه .. وكأنها جريمة أخرى يراد بها ان تضاف لجريمته .. واسمحو لي أن أقول هنا ان الانسان اذا عوقب فلا بد ان يكون العقاب من جتس العمل .. والعمل هنا لا بد ان يكون بفعلة هو .. فهل هو الذى قام بالخطيئه؟ .. ان الله لا يحاسب عبداً علي ما اقترفه الغير .. فانه وكما يعرف الجميع هو العادل الأكبر في ميزانه .. دعونا نتخلي عن علاقة السببيه بين ظروف الفرد وبين أفعاله حتي لا نزهق روح بلا حق وتضيع منا قيمة العدل الذى هو أساس الملك ..

إظلام تدريجي

الزنانة

- (رجل الدين الذي يفلق المصحف بعد أن يختم صلاته وهو يقف امام صلاح الذي نراه جالسا أرضاً في حاله من الذهول التام)
 صدق الله العظيم .. قول ياصلاح .. استغفر الله ..
 استغفر الله ..
 وندمت علي ما فعلت ..
 (الذي يقف فجأة معترضاً ويتجه نحو الشباك الصغير وهو يتجه نحو السماء ويهز رأسه بالنفي) .. لا موش هاندم .. لا ..
 الندم يابني ضرورة لكل إنسان مؤمن ..
 (في حده) .. انا ماقتلتش يامولانا .. ماقتلتش ..
 دي حاجه بينك وبين ربك .. جايز تكون زى ما بتقول .. شئ يعلمه هو ..
 واتعدم واتشئق علشان جايز أكون وجايز ماأكونش ؟ ..
 ياابني القاضى حكم باللي شايفه .. والحكم اللي احنا فيه دلوقت هو نصيبك في الدنيا ..
 (وهو يستدير فى جنون) نصيبي !! .. أموت .. أتعدم ظلم واتحرم من حياتي .. وتقولي ده نصيبك في الدنيا !! ..
 وليه ماتقولش ان دي تعتبر ساعتك ..
 (وهو يتحدث للمصلح في شبه توسل) .. يامولانا .. أرجوك اتفضل ..
 اذا أقسمتلك بالله اني ماقتلتش .. ممكن تصدقني ؟ ..
 أظن جاوبتك قبلكده وقلتلك الله أعلم ..
 يعني موش مصدقني ..
 هو وحده المطلع علي ما تخفي الصدور والسرائر ..
 (يبدو انه في انهيار تدريجي) .. والناس هاتوصل لده ازاي علشان تتأكد من برانتي ؟ ..
 يكفاك الله يعلمها علام الغيوب ..
 اللي عاوز اعرفه انا ليه مصدق كلامك من غير دليل وانتي ليه مش عاوز تصدق حلفاني رغم ان معايا الدليل ؟ ..
 ايه هو ؟ ..
 إيماني برينا .. وبانه مايرضاش بالظلم .. (صلاح يبدو عليه الانهيار أكثر وأكثر) .. انتوا ليه عاوزني أموت ؟ .. ليه عاوزني أرضى بظلمكم وشويه شويه اقولكم متشكرين ؟ .. فيه حد في الدنيا يوافق علي انه يتشئق وهو برئ ؟ .. انتم عاوزين

المصلح

صلاح

تجننوني ۰۰ عاوزين تجننوني ؟؟؟ ۰۰ حرام عليكم ۰۰ حرام
 عليكم ۰۰ (يصرخ في هستيريا) ۰۰

إظلام تدريجي

المحكمة

(علي منصة القضاء يقف صلاح وهو يقرأ من ورقه طويله للغايبه تمتد الي بداية خشبة المسرح) . .
 بالنظر في قضية مقتل الحاج مختار . . والمتهم فيها المدعو صلاح الدين فتوح . . وبعد الإطلاع علي أقوال الشهود . . واستعراض كافة الأدله والبراهين التي قدمها دفاع المتهم . . وجد انه برئ من كل ما نسب إليه . . وعليه . . فقد حكمت المحكمة ببراءته وإخلاء سبيله وحفظ أوراق القضية لمجهولية مرتكبيها الي حين القبض عليهم أو إستيقاظ ضمايرهم وتقديم أنفسهم للعداله . . رفعت الجلسة . .

صلاح

(صلاح وهو يصفق ويصفر كما كان الجمهور في بدايه المسرحيه وينفس الاسلوب المتقطع اسلوب مباريات الكوره : هو . . هو . . براءه . . هو . . هو . . براءه) . .

(فجأة يظهر جميع الممثلين الذين اشتركوا في العرض يحيطون بصلاح ويدفعونه في صرامه نحو قفص الاتهام . . وصلاح بالداخل يبدو بالفعل انه قد أصيب بالجنون وهو يسمعهم وهم ينشدون سوياً في لحن جنازى متصاعد شيئاً فشيئاً ليصل الي نشيد للثأر يدوى في جنبات المسرح) . .

هو ده المتهم . . هو ده اللي قتل . . ازاي ده أصلاً جه هنا . . وازاي ده أصبح مننا . . لازم يتعدم . . لازم يتعدم (تكرر)
 (ينصرف الجميع ويبقي مختار ويتقدم نحو الجمهور ليحدثه في سخرية من صلاح) . .

لجميع

تصوروا حضراتكم ان المتهم صلاح الدين فتوح أخذ براءه من الإعدام ؟ . . أنا شخصياً موش عارف دي حصلت ازاي . . صلاح يطلع برئ وموش هيتشقق !! . . ده كلام ؟ . . (ثم وهو ينظر نحو صلاح) . . عارفين ايه سبب البراءه ؟ . . قال ايه الجدع ده ولا مؤاخذه وبعيد عنكم جميعاً . . إجنن . . والقانون بيقول ان اللي يجنن مايتعدمش . . اللي يتعدم لازم يكون صاغ سليم ويحس بحبل المشنقه . . ويشوف تبرينه عشاوى . . وتبقي آخر حاجه يشوفها . . (فجأة يبكي مختار وهو يتقدم نحو القفص حيث يحتضن الأسياخ الحديدية في الوقت الذي يقوم فيه صلاح بأداء حركات غير مفهومه بداخل القفص) . . معلش ياصلاح . . معلش . . انت اتظلمت كتير . . وجايز جنانك ده هو شاهد النفي الوحيد علي انك مظلوم . . الظلم مستقصدك من البدايه . .

مختار

من ناس لا تعرفهم ولا يعرفوك .. ناس جابوك للظلم وسابوك
 .. وبعدين اتظلمت من ناس تانيه تعرفهم .. وللأسف عمرهم ما
 عرفوك .. وبين اللي تعرفه واللي ماتعرفوش فيه حقيقه واحده
 لا بد تعرفها .. حقيقه إسمها الموت .. الكل هايموت .. لكن
 الظلم هايفضل باقي .. لحد آخر بني آدم ما يموت .. ساعتها
 بس الظلم هايموت .. لان اللي اخترعه أخيراً .. وبعد ظلم
 طويل .. مات ..

إظلام تدريجي مع نزول الستار

المداولة الثانية

شرف القتل


المنظر

(خلفية المسرح ستارة بيضاء عليها الكثير من بقع الدماء وكذلك أثار بصمات لبعض الأيادي بلون الدم أيضاً ٠٠ وفي الوسط صورة زفاف لفتاة في بداية سن المراهقه ٠٠ وخشبة المسرح بها ثلاث ديكورات :

الأول : من يمين المسرح (منزل الأم) وهو عباره عن هيكل لمنزل ريفي من الداخل وأمام الباب توجد (المصطبه) الشهيره لمثل تلك المنازل ويتوسط المنزل سرير عتيق ٠

الثاني : من يسار المسرح (منزل الأب) وهو عباره عن هيكل أيضاً لغرفه تتوسطها طاولة عليها زجاجات الخمر وما شابه ذلك أما الثالث : وفي الوسط نرى شيزلونج كبير وأمامه مقعدان شرقيان من الجلد ونشعر من خلال الديكور هنا بالترف يحيط بالمكان الي حد ما ٠

نلاحظ أن هناك طريق يربط الديكور الأول بالديكور الثاني وكذلك طريقان يربطان بين الثالث والأول والثالث والثاني ، أى أن الديكور الثالث هو رأس المثلث لتلك الديكورات ٠٠



(مع إظلام الصاله تتركز الاضاءه علي اللوحه الزيتيه للفتاه في
 ملابس الزفاف ونسمع زغاريد (وكأنها صراخ) ودقات الطبول
 في همجيه وكذلك صراخ الفتاه في عنف . .

ص/ فساء يغنين

بيضتي الشاش . . يا عروسه . .

حلقك رشاش . . يا عروسه . .

.....

قولوا لأبوها ان جعان يتعشى . .

وان كان شبعان يفرح ويروح يتمشى . .

عرضه إتستر واللي يحبه اتهنى . .

واللي يعاديه تنذب في عينه مقشه . .

بيت المخدوم

(تنسحب هذه الأصوات بعيداً .. ثم تضاء منطقة الوسط لنرى تلك الفتاة - صاحبة الصورة - في ملابس ريفيه تمسك بيدها (مقشاه) وتقوم بتنظيف المكان في شئ من الاقبال والسعادة)

..

قولوا لأبوها ان كان جعان يتعشى ..

(الفتاه (تغني)

(يدخل المسرح شاب وسيم جلسه دون أن تراه الفتاه إذ يفاجأها بلكزه في خصرها فتصرخ خائفه وحيث تتعرف عليه وتقوم بحركه " البصق في صدرها " قبل ان تتحدث وتعبر عن عتابها له) ..

اتخضيتي ؟ ..

الشباب

ودى طريقه برضه يابيه تدخل علي بيها ؟ ..

الفتاه

أمال عاوزاني لما ادخل اعمل ايه ؟ .. أقول إحم انا وصلت ..

الشباب

ولا أقول دستور ياناس ياللي هنا ؟ ..

(تنظر له في تحدى ثم تعاود عملها في عنف ويبدو عليها الضيق الشديد منه لتثار الأتربة في وجهه من المقشاه) ..

ايه يابت .. موش تحاسبي ؟ ..

الشباب

ياريت انت اللي تحاسب ..

الفتاه

أحاسب علي إيه ؟ ..

الشباب

علي نفسك .. لا تتبهدل ..

الفتاه

(وهو يجلس علي الشيزلونج في استرخاء وينظر لها في تفحص) عيبك ان كلامك زى الدبش .. حاولي تحسني ملافظك شويه وتدردي ..

الشباب

(الفتاه لا تجيب وتلقي بالمقشاه وتهم بالتنظيف بالقوطه الصفراء وهي تنظر الي بعيد) ..

كلامي مش مفهوم ولا ايه .. يابت احنا عاوزين نفهم بعض ونقرب من بعض .. معقوله ابقى انا وانت في بيت واحد وبقي لنا أكثر من اسبوع ولسه ماحصلش ؟ ..

الشباب

(الفتاه لا تفهم ما يرمي اليه وهي تجمع أدوات النظافه استعداداً للمضى) ..

انا باكلم هيروغليفي .. ردى علي كلامي ..

الشباب

موش فاهمه حاجه منك ..

الفتاه

انتي فاهمه ..

الشباب

وشرفك ما فاهمه ..

الفتاه

منزل الأب

(منزل الأب الذي نرى زوجته اللعوب تجلس الي الطاولة تلاعب
نفسها بالورق وهي في حالة من الانسجام .. حيث تدخل الفتاه
من الباب المفتوح لتحدثها في تودد واستعطاف .. وتلاحظ
ورقه ملقاه علي الارض تحملها وتقدمها لها في حذر شديد) ..

مساء الخير ياامرات أبويا ..

(في دون اهتمام) نعم ؟ ..

أبا

ماله ؟ ..

أبا هنا ؟ ..

عشان ..

عاوزاه ..

وانا ماانفعلش ..

(تحاول التملق بابتسامه باهته) ازاي .. ده انتي الخير والبركه

.. بس اني يعني زى ما تقولي كده .. محتاجاه في موضوع

خصوصى ..

خصوصى ؟ ..

أيوه .. مايتقالش ..

ولما هو مايتقالش .. هاتقوليهوله ازاي ؟ ..

مهما كان الأمر .. الأب لازماً يتحمل .. أمال هو اتخلق لاجل

ايه ؟ ..

(وهي تعود للعب بالورق دون اهتمام أيضاً) أبوكى موش شايفاه

بقاله كام يوم ..

(في ألم) .. مسافر ؟

علمي علمك ..

كان نفسى يكون هنا لاجل ما ينجدني ..

ينجذك من ايه ؟ ..

(في استسلام) من الشغلانه اللي اني فيها ..

مالها الشغلانه ؟ ..

سيدي الصغير ..

ماله .. ضربك ؟ ..

ياريت ..

شتمك ؟ ..

ياريت ..

الفتاه

زوجه الأب

الفتاة

زوجه الأب

الفتاة

زوجه الأب

الفتاة

زوجه الأب

الفتاه

زوجه الأب

الفتاه

زوجه الأب

الفتاة

زوجه الأب

الفتاة

زوجه الأب

الفتاة

زوجه الأب

الفتاه

زوجه الأب

الفتاه

زوجه الأب

الفتاه

زوجه الأب

الفتاه

- طردك ؟ ..
 كان يبقي أرحم .. اقله كلاب الشارع الناس شايفها وعامله
 حسابها .. لكن كلاب البيوت النفر منا مايعرفش سعرتها امتي
 هاتيبي ..
- زوجہ الأب
 الفتاه
- (تضحك ضحكه عاليه) ايه الكلام المستغطي ده يابت .. كلاب
 الشارع ايه وكلاب بيوت ايه .. ماتفهميني ..
 كلاب الشارع لا يمكن تعض إلا لواحد أذاها .. لكن كلاب
 البيوت بتعض من غير أذيه .. (فجأه) .. أني عايزه أبا ..
 وأنا احبب هولك منين ؟ .. دورى عليه .. ولو لقتيه ابقى قوليله
 اني انا كمان عايزاه .. مستتياه علي الغدا .. علي العشا ..
 المهم انه يبجي والسلام .. مع السلامه ياغندوره ..
- زوجہ الأب
 الفتاه
- زوجہ الأب
- (الفتاه تنظر للمرأة وهي تهز رأسها بالاسف لكل ما تسمعه في
 حسرة واضحه ثم تمسح دموعها في مراره وتمضى للخارج
 حيث يظلم منزل الأب) ..

إظلام

منزل المخدوم

(يسلم الضوء علي الفتاه ويصاحبها الي مقدمة المسرح حيث منزل الشاب الذي بضاء شيناً فشيناً وينتهي الأمر بأن تجلس الفتاه حزينه بالارض وتلقي برأسها علي إحدى المقاعد في ألم وحزن)

دي تالت مره أروح لأبويآ . . وعاشر مره مالقاهوش . . أنا عايزاه يعرف . . لكن مين اللي هيعرفه . . مرته ؟ . . مرته لا يمكن هنقوله . . وتقوله ليه وهي مش عاوزه مزاجه يتعكنن . . ولا جايز بتخاف عليه لايجراله حاجه . . طيب وايه يعني لما يجراله ؟ . . موش أحسن ما يجرالي أني ؟ . . (لحظة صمت) . . لا . . حرام . . وألف بعد الشر عليه . . ده أني عندي أموت لاجل ماهو يعيش . . بس نفسي اشوفه . . نفسي . . نفسي . . (ينادي من الخارج فجأه) . . انتي يابت . . انتي فين ؟ . . (يدخل المسرح ليراها جالسه دون أن تكثرث لقدمه) . . ايه . . نايمه ؟ . . اذا كنتي نايمه يبقي كويس . . واذا كنتي عامله فيها نايمه يبقي كويس الكويس . . ياسلام علي الكويسات لما تبقي ساكته . . (ويقتررب منها أكثر لكنها فجأه تقف لتواجهه في تحدي) . . فيه ايه ؟ . . (ثم يغير من لهجته) . . انتي كنتي فين ؟ . . قوليلي كنتي فين ؟ . . كنت بره . .

ص / الفتاه

الشاب

الفتاه

الشاب

الفتاه

الشاب

(مستكراً) . . انا عاوز افهم ايه حكاية المكوجيه دول . . هما دائماً مستقصدني . . ولا تكونيش انتي كمان بتحبي الصنف ده وعاوزه تتجوزيه . .

الفتاه

الشاب

هو فيه حد كان هنا واتجوز منهم ؟ . . كل واحده بتبجي بتبقي معجبه بيهم . . مسافه ماتربط معاهم تتأهل عدل وانا اتفرقع . .

الفتاه

الشاب

ماتخافش . . لسه بدرى علي السهرايه دي . . (وحين تنهض الفتاه وتمضي خلف الاريكه وتتناول سلته مهملات وتتجه نحو الباب فيستوقفها ممسكاً بذراعها) . . سايباني ورايحه فين ؟ . .

الفتاه

الشاب

أرمي الزباله . .

سيبك منها دلوقت . .

أمام منزل الأم

- (نرى الأم وهي تجلس علي المصطبه وتقوم بغزل شال كبير ..
وتدخل الفتاة وترتمي في أحضانها) ..
وحشاني يامه .. وحشاني ..
عامله ايه ؟ ..
عامله ايه ؟ ده أنا ياما قعدت ابكي وافتكرك واقول فين هي لاجل
ما اشتكيلك وجيعتي .. (فجأه) .. وياما كنت احلم اني باز عقلك
وباخانقك واقول للناس محدش يحوشني .. (الفتاة تنهض
معرضه) .. ازاي يامه تسبيني .. ازاي تنسى ان ليك بنت
محتاجه لك .. محتاجه لأم تسأل عنها .. آني في اول الامر
كنت عاذراكي عشان الراجل الغريب اللي اتجوزتیه .. لكن
دلوقت ..
(مقاطعه) .. المهم أخبارك ايه ؟ ..
لغاية دلوقت بخير .. (تغير لهجتها لشعورها بالبروده) .. ما
تقومي بينا ندخل في الدفا ..
عمك نايم ..
نقعد في المطرح الثاني ..
صوتنا يصحيه .. قوليلي .. انتي سبتي الشغل ؟ ..
(الفتاة تعود وتجلس بجانب الأم وتتناول طرف الشال الذي بيدها
لتلتحف به من البروده) ..
(التي لاحظت صمت الفتاة) .. ما بتريش يعني ؟ ..
آني ماسبتش الشغل .. آني هربت منه .. نفدت بجلدى .. اللي
شفته هناك خلاني أشمع الفتله وأخلع في أول قطر يقابلني ..
(في إزدراء) تخلعي وتشمعي !! .. مين يابت اللي علمك الكلام
اللي مالوش طعم ده ؟ ..
الشغل ..
أنا وابوكى سلمناكي لبيت طيب .. موش لحارة عوالم ..
العوالم أشرف ..
أخرسى ياقليلة الحيا ..
خرست كثير ومن حقي بقي أتكلم .. نفسى أفضفض ياناس ..
نفسى أقول فيه ايه ..
(مقاطعه) رحتي لأبوكي ؟ ..
كل ما اروح مالا قاهوش ..
عنه ما اتلاقي .. انتي عاوزه ايه دلوقت ؟ ..
- الفتاه
الأم
الفتاه
الأم
الفتاه
الأم
الأم
الفتاه
الأم
الفتاه
الأم
الفتاه
الأم
الفتاه
الأم
الفتاه
الأم

- عايزاك تقوليهاالي يأمه من غير خشا ٠٠ انتي لسه أمي ولا آني
جايه لواحد غريبه ؟ ٠٠
- (الأم تسحب الشال من الفتاة في عنف وتقف في ضيق شديد
وهي تنظر للداخل لتطمئن علي عدم وجود أحد يتسمع عليها من
الداخل) ٠٠
- طول عمرك زي ابوكي لسانك متبرى منك ٠٠ فيه بنت متربيه
تقول الكلام ده ؟ ٠٠
- (في بكاء) باقولك يأمه اني هربت ٠٠ طفشت ٠٠ محتاجه
لصدر حنين يضمني بدل الفضيحة اللي هاتفضحها ٠٠
- (في انزعاج) يامصيبتك السوده ؟ او عي يابت تكوني سرقتي
حاجه منيهم ؟ ٠٠
- اني عمرى ما كنت حراميه ٠٠ وديلي أظهر من اني أعملها ٠٠
أمال طفشتي ليه ؟ ٠٠
- ديلي كان هابتجس ٠٠
يتجس ؟ ٠٠
- سيدي الصغير ٠٠
ماله ؟ ٠٠
- (في تلثم) ٠٠ كان ٠٠٠٠٠
كان ايه يابنت ٠٠ انطقي ٠٠
كان ٠٠ كان بده يتجوزني ٠٠
- (الأم وهي تلقي بالشال وتضحك في سخرية وتلف حول نفسها
لعدم تصديقها ما تقوله الفتاة التي تنظر لها في دهشه وذهول)
٠٠
- موش مصدقاني يأمه ؟ ٠٠
(بعد ان تتمالك نفسها) ٠٠ ليهم حق يطردوكي ٠٠
يطردوني ؟ ٠٠
- أيوه ٠٠ علشان كلام المجانين اللي بتقوليه ده ٠٠ بصى لنفسك فين
وبصى هو فين ٠٠ عموماً روجي ارجعي شغلك ٠٠ وانا هابقي
أجي اشوف الحكايه دى ٠٠
لاجل خاطرى يأمه بلاش ٠٠
- هتروحي ولا أصحي عمك ياخذك بيده يوديكي علشان مالكيش أب
قادر يكسرك ٠٠
- (في خوف) لا يأمه بلاش ٠٠ خللي الطابق مستور ٠٠ أنا
هاروح بنفسى ٠٠ فتك بعافيه ٠٠

منزل المخدوم

- (مع إظلام الديكور تدخل الفتاة في حزن ويأس وتصطدم بالشاب
الذي يركع أمامها في توسل تمثيلي) ..
- الشاب : ارحميني بقي .. كفايه .. احنا الاتنين مالناش غير بعض .. انا
بحبك .. بحبك .. ياريت تفهمي يعني ايه بحبك ..
- الفتاة : النصيبه فاهمه .. فاهمه انها كلمه بدايتها هنا .. (تشير الي
الشيذلونج) .. واخرتها هناك .. علي الرصيف ..
- الشاب : فيه راجل بنيم مراته علي الرصيف .. ليه هو مفيش سرير ؟
الفتاة : (في حده) انت مش جوزي .. ولا انا مراتك .. ولآخر مره
باقولك بعد عني ..
- (الشاب يقف في ضيق ويشيح بوجهه عن الفتاة في أداء تمثيلي
أيضاً) ..
- الشاب : مافيش فايده .. كنت فاكرك بتحبيني قد ما باحبك .. كنت فاكرك
ان موافقتك علي جوازنا في السر تشجيع لي علشان أخلص
جامعتي وأعلن جوازنا قدام الناس .. وعلي فكره .. صاحبي
الكناس اللي قلناك عليه ده انا مجربه .. صدقيني ماتخافيش ..
- الفتاة : (مقاطعه) .. بطل كلام فارغ بقي واحترم نفسك .. انت ايه ؟
.. مابتخسش ؟ ..
- الشاب : شويه .. بس انتي الظاهر مابتحسش خالص ..
- الفتاة : (وهي تبتعد عنه في خوف) .. عارف لو قربت مني هاصوت
والم الدنيا عليك .. واقول للخلق كلها علي حكايتك وحكاية
صاحبك الكناس ..

إظلام

منزل الأب

- (يضاء الديكور هنا حيث يقف الأب أمام زوجته الجديده ويبدو
منكسراً أمامها وهي تتطلع له في سخرية) ..
أنا ياخويا موش قاعده هنا لاجل مااستلقي المراسيل منك ومنها
.. شوقك صرفه .. أنا طهقت ..
هو آني اللي باقولها تيجي ؟ ..
ماقلتش .. بس في يدك تقولها ماتجيش ..
حاضر .. هاقولها ..
خللي بالك البنيت دى لو جاتني هنا تاني لا انت ولا هي هاتعتبوها
واروح فين ؟ ..
روح مطرح ما بتروح .. خليك في الخماره نام فيها تبقي عملت
مصلحه .. هو انا متجوزه ولا حاسه ان فيه راجل معايا في
البيت ؟ ..
ليكي علي لما اروح أول الشهر آخذ النقدية هانبه عليها ماتهوبش
الناحية دى .. مبسوطه ؟ ..
أول الشهر لما الحبايب تتجمع مع بعضيها ..
حبايب مين ؟ ..
مراتك القديمه .. أمها ..
وآني مالي ومالها .. دى واحده بتروح لاجل ما تتحصل علي
نصيبتها هي التانيه ..
المثل بيقول القديمه تحلي ..
بقي اللي معاه القمر .. يبص في وش اليوم .. ده كلام !! ..
(أخيراً يتجه نحو الباب للخروج) ..

زوجة الأب

الأب

زوجة الأب

الأب

زوجة الأب

الأب

زوجة الأب

الأب

زوجه الأب

الأب

زوجة الأب

الأب

زوجة الأب

الأب

إظلام

أمام منزل الأب

- (حين يمضي الأب للخارج يلتقي أمام المنزل مع الفتاة التي
تجرى نحوه وتمسك بيده وتقبلها في خوف) ..
فتاة الأب الفتاة
فينك يا أبا .. جتلك كتير وما بلا قاكش ..
فيه ايه يابيت ؟ .. عايزه ايه ؟ ..
خايفه يا أبا .. خايفه لبنتك تبقي سبب الطين اللي ها يحط علي شالك
.. وراسك تطاطي وسط الرجاله ..
الأب
(يصفعها في قسوه لتسقط علي الأرض عند قدميه باكيه وفي
لهجه صارمه) .. منك انتي شالي ها يجيله الطين يا فاجر ه ..
عيله ايه انتي لاجل ما تعرفي الكلام ده ؟ ..
فتاة
الكلام ده عرفته بدرى صحيح .. بس ما بيديش حيله .. شوفلي
مكان تاني يا أبا اشتغل فيه .. خدني عندك خدامه لمرتك حتي لحد
ربنا ما يسهلها .. خدني يا أبا ..
الأب
موش قادر اصدقك .. موش قادر .. معقوله عقلك يستف الكلام
ده كله ؟ .. (ثم بعد لحظة صمت) .. يكونش يابيت لبكلام ده
اتعلمتية من التلافزيون عند أسياذك ! .. (فجأه) .. اسمعي
.. آني ها جيلك واحقق في السهرايه دي .. ووالله في سماه لو
طلعتي كدابه لاكون قاتلك وشارب من دمك .. فزى قومي علي
هناك ..
فتاة
أرجلهم تاني ؟ ..
الأب
أيوه ترجيلهم وتقوليلهم يسامحوكي .. ياللا ..
فتاة
(تنهض منكسره دتتةقف لتواجه الأب بنظرات عتاب وأسف)
ماتعوقش يا أبا .. أحب علي يدك ماتعوقش ..
الأب
قلتك روعي وأني جاي ..

إظلام

منزل المخدوم

(بضاء الديكور هنا حيث يقف الشاب ينتظر قدوم الفتاة التي تدخل بالفعل فينصرف الي قراءة كتاب بيده) ..	الشاب
(دون اكتراث بالفتاة) .. بالمناسبه .. مافيش حد في البيت .. كلهم خرجوا ..	الفتاة
يعني أني وانت دلوقت وحدينا ..	الشاب
حبيت أديك فكره .. جايز الحكاية دي تريحك وتخليكي تشاوري عقلك ..	الفتاة
أخرس ..	الشاب
خرسنا .. ولو جدعه ماتناميش الليله .. لأنني بصراحه كده .. موش ناوى علي خير .. ماشى ؟ ..	

إظلام

منزل الأم

- (يضاء الديكور حيث الأم التي تجلس بجانب زوجها الذي يجلس
 في استرخاء وهيام) ..
 (في دلال) انت هاتفضل قاعد جارى كده علي طول ..
 عاوزاني أعمل ايه ..
 ولا حاجه يا أول بختي ..
 صدق الكلمه دي ..
 صدق .. وانت ؟ ..
 الراجل مننا لما يعشق الحرمة يبقى علي الدنيا السلام .. وأني
 عاشق .. غرقان في العشق لشوشتي ..
 والعاشق مايسبش وليفته تشوف حالها ..
 برضه مصممه تروحي لبنتك بكره زى ما بتقولي ..
 عاوزه أروح لاجل ما أبطل حجتها واعقلها .. وبالمره أجيب
 الشهرية ..
 (في ضيق) .. الشهرية اللي بيقاسمك فيها المحروس ..
 هاعمله ايه .. كل ما تيجي السيره يقولي زى ماهي بنتك بنتي انا
 .. كمان ..
 إلهي يجيله خابط ..
 (في دلع) .. الخابط جاله من يوم ما ظهرتلي ياسبع الليل ..
 (ثم وهي تنهض) .. أروح أقفل الباب وأجي ..
 بسرعه ياسنيوره ..
 (المرأه تنهض وتتجه نحو الباب لتفاجأ بالفتاة أمامها فيبدو
 عليها الضيق) ..
 تاني جيتي ياوش النحس .. أني مش قلتك جياالك ..
 صدق يأمه .. صحيح كنتي جياالي ؟ ..
 عاوزاني أجيلك وش الفجر ..
 وش الفجر ده ايه .. الليل لسه في أوله ..
 خلاصة الكلام .. نعم ؟ ..
 محتاجالك يأمه ..
 ما قلتك جياالك ..
 الوقت بيجرى بي ..
 ياريتة كان قطر سكه حديد ويدوس علي رقبتك ..
 ياريت .. ياريت لاجل ماترتاحوا كلاتكم ..
 بطلي دوشه واتفضلي روحى .. والصبح آني جياالك ..
- الأم
 زوج الأم
 الأم
 الفتاة
 الأم
 الفتاة
 الأم
 الفتاة
 الأم
 الفتاة
 الأم
 الفتاة
 الأم
 الفتاة
 الأم

فارقيني بقي ..
(في إنكسار) .. حاضر .. هافارقك ..

الفتاة

إظلام

منزل المخدوم

- (يضاء الديكور ويظلم المسرح كله حيث تدخل الفتاة ويستقبلها الشاب فاتحاً ذراعيه . . الفتاة تنظر حولها فلا تجد أحداً خلفها)
 قتلتك البيت فاضى . . وانا فاضى . . وللأسف موش قادره تفهمي . . بالذمه أنا مش أحسن من اللي بتروحيلهم . . أنا هاديكي الحنيه علي أصولها . . هابسطك وأدلحك . . ومن هنا ورايح موش هاخليكي تعملي جنس حاجه وحدك . . هاكنس معاكي . . وامسح معاكي . . وأغسل معاكي . . ايه رأيك . . ياللا . .
- (وهي تنظر له في استسلام وتحطم وتندفع نحو الشاب وتلقي بنفسها بين أحضانه . . ثم ها هي تطعنه بخنجر في يدها في ظهره ليسقط قتيلاً) . . ياللا . .
- (وهو يعاني من سكرات الموت) . . كنت فاكر ان مفيش قدامك ولا بديل . . لحد ما اخترتي البديل اللي عمره ما جه علي بالي . . دلوقت الزباله دى مين يشيلها . . فين صاحبك الكناس عشان يكنس . . فين هو . . فين . . (تبكي وتسقط أرضاً) . .
- (يدخل الأب كما تدخل الأم ويقتربان من الفتاة التي تجلس القرفصاء بجانب جثة الشاب وهي تعاني من رجفة أصابتها وشئ من الهستيريا) . .
- قتلتيه ؟ . .
 ده أول واحد . .
 والتاني هايكون مين انشاء الله ؟ . .
 (وهي ترمقه بنظرة إحتقار) كل زبال يشبهله هاقتله . .

اظلام تام بالمسرح ويسلط ضوء مركز علي اللوحه الخلفيه

- صوت
 حكمت المحكمه حضورياً علي الطفله المتهمه في جريمة قتل مخدومها الشاب بإيداعها دار الإصلاحيه لعدم بلوغها السن القانوني لقيام الدعوى الجنائيه ضدها . . رفعت الجلسة . .
- (يضاء المسرح كله ونرى الفتاة وهي تقف مرفوعه الرأس قويه وشامخه) . .
- قلت لفضيله القاضى قبل ما يحكم . . لو كان حصلي اللي البك
 الفتاة

كان عايزه .. ياترى كان هايتقام عليه الحد زيي ويتحاسب علي
 عملته .. ولا الميه عمرها ما تطلع في العالي .. ماسمعنيش
 لانه ماحصلش .. الظاهر كان لازم اضيع لاجل ما يسمعني ..
 ولو سمعني وقال فين الدليل بعد الكناس ما يكنس كنت هاعمل ايه
 .. مكانش هيبقي قدامي ساعتها غير اني أقتل نفسي ولا أمشي
 في سكه بطاله ينهشني كل كلب بنيابه .. ويحاوط علي كل ديب
 بالأعيه .. وتتوه حقيقه بنت دافعت عن شرفها وشرف ناس في
 الاصل مايشرفوش ..

ص/ النساء يغنين قولوا لأبوها ان كان جعان يتعشى .. الخ

إظلام تدريجي مع نزول الستار

المداولة الثالثة

المداولة بعد الحكم أحياناً


المنظر

قاعة المحكمة يسودها الظلام ورغم ذلك نتبين في ضوء خافت هذا الديكور :

(١) من يمين المسرح : منصة القضاء التقليديه ذات الثلاث مقاعد في المنتصف ثم في أقصى اليمين مقعد ممثل الادعاء .
(٢) من يسار المسرح : مقاعد الجماهير ذات مستويين :

أ- المستوى الأعلى به مقاعد فخمه ومزينه بشكل يوحي بزينة أعياد الميلاد للأطفال ونلاحظ يافظه كتب عليها (الناس الغلابه)
ب- المستوى الأدنى ليس به مقاعد علي الاطلاق ومغطي بطبقه من الخيش ويبدو الشكل العام لهذا المستوى بسيطاً وفقيراً الي أبعد الحدود حتي اليافظه التي تعلوه عباره عن ورقه ممزقه كتب عليها (الناس المقتريه) .

(٣) في منتصف المسرح : قفص الاتهام وهو عباره عن قفص عصفور كبير يتسع لرجل ان يجلس به بل ويقف أيضاً وما يتبع ذلك من حركة لأداء الممثل بالمسرحيه .



المشهد الأول :

(يتقدم المتهم وهو مكبل بالأغلال ومن خلفه الجندي الذي يمسك بلمبه جاز وعصا كبيره ليسطع الضوء في جنبات المسرح ..
المتهم رجل رث الثياب رقيق الحال ولكن تبدو عليه علامات القوة والذكاء .. أما الجندي فيرتدى ملابس السهره "
الأسموكن " وهو رجل مسن في حاجه لمن يأخذ بيده ..
ورغماً من ذلك يحاول أن يظهر سيطرته علي المتهم الذي ينظر له في عطف وشفقه) ..

الجندي خش يامزور .. يامجرم باللي اسمك بلاص .. خش علي القفص ..

المتهم بالراحه علي نفسك ياشاويش .. لا بعدين تفك .. بالراحه .. خش ..

المتهم أفتحلي وأنا أخش ..

الجندي خذ المفاتيح أهه .. افتح واقفل علي نفسك .. وبعدين اديهوملي

المتهم فين هي المفاتيح ؟ ..

الجندي يأخي أصبر لما أريح شويه .. هو مافيش حلم ..

(يجلس الجندي أرضاً ويعبث في جيوبه بحثاً عن المفاتيح) .. آجي أساعدك ..

المتهم تساعدني .. قالولك عليه أكتع ولا مكسح ولا مكحكح ..

الجندي (يسعل) .. الصحه عال والحمد لله .. والقوه ماتقولش عليها ..

احنا اللي قالوا علينا بنجيب التايهه .. ونعدل المايله .. (فجأه)

.. ميل ياللا وخذ بايدي خليني أقف .. وقفت الميه في زورك ..

(المتهم يساعد الجندي في الوقوف حيث يبدو ان الجندي وجد

المفتاح أخيراً في إحدى جيوبه ويقبض ببيجه بشدة علي شئ ما)

الجندي أهه .. ياما انت كريم يارب ..

المتهم هات ياشاويش ..

(الجندي يفتح بده الفارغه ويقذف في الهواء بما داخلها) ..

الجندي ألقف بقي .. ألقف ..

المتهم (في ضيق) ألقف ايه ؟ ..

الجندي المفتاح ..

المتهم أنهي مفتاح ؟ ..

الجندي كده ضيعته ؟ ..

المتهم انت كان في إيدك حاجه ؟ ..

الجندي مش شفتني وأنا باحدفه ..

المتهم ايه اللي حدفته ده ؟ ..

- س سؤال .. باب القفص علشان يتفتح موش لازم يكونله مفتاح ؟
مضبوط ..
وأنا قعدت أدور عليه قدامك ..
حصل ..
وبعدين قلتك ألقه ...
تمام ..
تبقي خدته وديته فين ؟ ..
ياعالم .. انت عاوز تجنني ؟ .. حرام عليك ياأخي .. موش
كفايه النصيبه اللي انا فيها .. عايز تلبسني تهمة ثانيه .. ده أنا
عندي كوم عيال ..
عارف عقوبة سرقة مفتاح القفص قد ايه ؟ ..
لا ما اعرفش ..
بتاع يبجي متين سنه ..
متين سنه ؟ ..
ده علي الأقل .. أدخل القفص ياللا من غير مفتاح لحد ما تلاقيه
ونبقي نفتحه من أول وجديد .. خش ..
(المتهم يتقدم نحو القفص ويحاول برفق ان يفتح الباب الذي
ليس له قفل ولا مفتاح أصلاً فتبدو عليه الدهشه) ..
ايه رأيك بقي ان القفص لا له لاقفل ولا مفتاح ..
ومين قالك انه بيتسك من أساسه .. انت هاتدعي علي شئ
ماحصلش ؟ ..
انا هادعي !! ..
عارف عقوبه اللي يدعي علي الشاويش تبقي ايه ؟ ..
خمسيت سنه ؟ ..
لا .. حبس انفرادي لغاية الوريث الثالث ما يموت أو تجيله داهيه
تشيله ..
أحسن حاجه ان الواحد مايفتحش بقه نهائي ..
واللي مايفتحش بقه هنا يعاقب بالاعدام ..
(المتهم يفتح فمه في بلاهه في محاوله أن ينجو من مثل هذه
العقوبه) ..
واللي يعمل كده يبقي أهبل ..
بسيطه .. دي نتحملها ..
عقوبة الهبل عندنا خمسين جلده الصبح وخمسين زيهم قبل النوم ..
طيب قوللي أعمل ايه انا في عرضك ..
اللي يقع في عرض الشاويش عقوبتها ..
(يقاطع الجندي بشق جلابه الي المنتصف تقريباً وفي جنون)
مرتاح كده ..

الجندي

المتهم

- الجندي
المتهم
- برضه لها عقوبه في القانون ..
عقوبه ولا موش عقوبه .. أنا بقي فقتت .. ولا عاد هاممني
شنق ولا جلد .. انت عاوز مني ايه ياراجل انت ؟ .. عاوز مني
ايه ؟ ..
- (المتهم يفتح القفص ويتقدم نحو الجندي في توعد في الوقت
الذي يتراجع فيه الجندي للخلف الي أن يختفي ونهائياً من
المسرح .. ليفاجأ المتهم بظهور المحامي الذي يواجهه في
تحدي وقوه) ..
- المحامي
المتهم
- أنت المدعو بلاص ؟ ..
أيوه أنا ..
- المحامي
المتهم
- ايه العمائل السوده دي اللي عاملها مع الشاويش ..
تبقي مين بسلامتك ؟ ..
- المحامي
- أنا المحامي بتاعك يا حبيبي .. انا اللي المحكمه جابتني علشان
أدافع عنك لأنك فقير ومش لاقى تاكل .. وبالأماره صايغ وضايغ
ومالكش ضهر يسندك .. صح ..
- المتهم
- كل اللي سيادتك قلته صح ماعدا حاجه واحده ..
اللي هي ؟ ..
إني صايغ ..
قوللي .. بتشتغل إيه ؟ ..
ولا حاجه ..
تبقي ايه ؟ ..
- المحامي
المتهم
- مش ذنبي اني موش لاقى شغل ..
شوف يا بلاص .. (يتوقف فجأه) .. الأول حاول ترجع القفص
بسرعه لبعدين تدخل في قضية ثانيه غير قضية التزوير اللي انت
زورته في اسم إبنك ..
- المتهم
المحامي
- أنا لا مزور ولا مجرم ولا أى شئ من اللي انت بتقوله ..
لأ .. انت مجرم ومزور وقررى كمان .. بقي تعمل اللي عملته
ده وتقولى موش مجرم .. لا مجرم ..
- المتهم
المحامي
- تقدر تفهمني بالظبط المحكمه دي مقوماك معايا ولا علي ؟ ..
معاك طبعاً ..
- المحامي
المتهم
- طيب ازاي تقوالى مجرم والمتهم برئ لحد ما تثبت تهمته ..
(وهو يتقدم بنفس التوعد السابق مع الجندي نحو المحامي الذي
يقلد بأصابعه المسدس في وجه المتهم) .. أنا بقي ها عمل فيك
عاهه علشان أبقي مجرم علي حق وأشيل قضيه علي حق ..
تعالى ..
- المحامي
- أى حركه منك هاضرب في المليون .. انت فاكر نفسك فين ..
دي محكمه ياله .. ويكون في علمك الحركه اللي عملتها دي أقل

حاجه فيها دبح .. فاهم يعني ايه دبح .. طبعاً ماتعرفوش لانك
عمرك ما دبحت فرخه ولا شويتها حتي .. علشان انت من
المعدمين .. الدبح ده يعرفه الأغنيا اللي زى حالاتي .. من أيام
ما كان الغني مننا بيتغدى بأسد ويتعشى بمراته .. أوعي تقول
كلمه واحده لأخلص عليك ..

المتهم

لا حول ولا قوة إلا بالله .. لا حول ولا قوة إلا بالله .. باقول ايه
يا اسطي ..

المحامي

أسطي ؟ ..

المتهم

استقراطي ياسيدى ماتز علش .. شوف انا ها ادخل القفص علشان
أنا مجرم زى ما بتقول .. ماشى ..

المحامي

ماشى ..

وانت تطلع من هنا علشان انت ضلالي زى انا ما باقول ..

المتهم

أنا .. ضلالي !! ؟ ..

المحامي

والضلالين عن المجرمين مايتخيروش ..

المتهم

لا انا موش زيك .. لا .. انت حاجه وأنا حاجه .. أنت من

المحامي

طبقه وأنا من عجينه .. أنا هنا وجودى لسبب إني أدافع عنك ..

بمزاجك أو من غير مزاجك ها دافع عنك .. ده روتين .. روتين

.. فهمت ولا نقولها تاني .. (ثم في لهجة أمره) .. ياللا

اتفضل خش القفص علشان اسألك كام سؤال لزوم الشغل ..

اسمك ؟ ..

المتهم

بلاص ابن زلعه ابن ماجور المدالج ..

المحامي

تمام الاسم .. البيانات اللي جمعتها عنك كلها ماتخرش الميه ..

(ثم في طريقه سريعه) .. انت صحيح أصلك واطي ؟ ومن

عيله واطيه وبيئه .. ومهنه العيله كلها زبالين ؟ ..

المتهم

مالهم الزبالين ؟ ..

المحامي

(في سعاده) .. التقارير لغاية دلوقت ماشيه عال .. تقدر

تقوللي آخر مره خلفت عيال .. هل كنت في كامل قواك العقلية؟

هو خلفه العيل عندكم بتيجي بالعقل ؟ ..

المتهم

معلوماتي كده ..

المحامي

(بلهجة أسف) .. الأغنيا دول مساكين ..

المتهم

إحنا مساكين يامتخلف !! ..

المحامي

المتخلف هو اللي بيتهباله ان الخلف بيجي بعقله ..

المتهم

امال بايه ؟ ..

المحامي

احنا في محكمه .. عيب ..

المتهم

وبتعترف صراحه انك مش منظمها ..

المتهم

ايه دى اللي أنظمها ؟ ..

المحامي

الحبوب يافندى ..

- لا عندك .. كله كوم والشتيمة كوم .. رغم اني ممكن أعديها
واقول القبيح يشتم الباشا .. لكن لأ .. الباشا هيستم القبيح ويهزاه
حسن ملافظك بعدين أنسحب من قضيتك واخنقك ..
- المتهم
- طظ في انسحابك .. تفنكر اني من غيرك هاضيع أكثر ما انا
ضايع .. ولا يعني موش هاعرف اهجص بكام بق من اللي
بتقولهم وتسلك القرشينات .. طظ فيك وفي دفاعك ..
- المحامي
- (في توعده) .. طيب يابلص يابن زلعه يابن ماجور .. ان ما
وريتك .. وحياتك اللي هاتعدمها بدرى لاسخن عليك المحكمة
وأشهد ضدك واقول انك مزور ومجرم مع سبق الإصرار
والترصد ..
- المتهم
- حتي لو كنت هأبجك عشر تلاف براني بعيد عن الملايم اللي
هايدوهو ملك ..
- المحامي
- انت حيلتك حاجه ..
- المتهم
- موش أنا مجرم زى ما بتقول ..
- المحامي
- مجرم ومنحط وواطي وأهلك كلهم دون ..
- المتهم
- طيب الواطي أبو أهل دون مايعرفش يتصرف في مبلغ هفيه زى
ده ؟ .. هي الفلوس اللي مالهاش حساب النهارده موش مايقتش
تجرى إلا في ايد بتوع الماكس والبانجو والبودره ..
- المحامي
- (مفكراً) .. مطبوط .. مطبوط كلامك يازباله .. والمبلغ اللي
بتقول عليه ده .. جاهز ؟ ..
- المتهم
- ورهن الإشاره ..
- المحامي
- يبقي انا خلاص قررت أترافع عنك بدمه ياصايح يامتشر د ياحقير
(في تعجب) .. هايترافع ده ولا هايبتواطي ؟ ..
- المتهم
- المثل بيقول حبه فوق وحبه تحت .. انت ماسمعتش قانون عدويه
ومذكرته التفسيريه يابنت السلطان ردى علي الغلبان ..
- الجندى
- (وهو يدخل مسرعاً ويشير بيده الي من يتبعوه ان يتقدموا
مسرعين) .. بسرعه لحسن الجلسة هاتبدأ خلاص .. اتفضلوا
ياأكابر .. اتفضلوا ياغلبه يامظلومين ..
- الجندى
- (تدخل مجموعه من ثلاثة رجال وتبدو هيئتهم من علية القوم
وهم يتجهون الي المستوى الأعلى ليجلسوا في تقزز شديد تحت
يافطة " الغلبه ") ..
- الجندى
- (وهو ينادى) .. ياللا .. الصيع يدخلوا .. وتنهم قيام جلوس
.. قيام جلوس .. لحد الجلسة ما تنتهي .. خشوا ..
- الجندى
- (يدخل المسرح رجلين ومعهم امراه تحمل طفلاً رضيعاً ونلاحظ
أن ثيابهم رثة وقذره للغاية ويتجهون نحو بلاص في القفص
لتحيته وهم شلضم وبيع وأم خيشه زوجة المتهم) ..
- شلضم
- أزيك يابلص .. قدره أخوك اللي في بلاد بره باعتلك السلام

- وبيقولك انه قرب يلم زبالتهم كلها وجاى لاجل ما يفتح مشروعه
 اللي بيحلم بيه .. خرايه مول ..
 فيك الخير يا ابو الشلاصيم ..
 كلنا معاك يا بلاص ..
 بلاص
 ببع
 بلاص
- تسلم يا ببع .. (ثم وهو ينظر الي زوجته التي تنظر له في لهفه
 واشتياق كبير) .. عامله ايه يأم خيشه ؟ ..
 ها عمل ايه وبلاص بعيد عني .. من يوم ما اتحبست وانا موش
 طايقه انزل الشغل واتسول ولا طالعاه من بقي نهائي كلمة الله
 يامحسنين .. امتي بقي تخرج وتجيلنا امتي .. عيالك مشتاقينلك
 .. وانا كمان مشتقالك وقربت أدى ودني للكلام الحلو اللي
 باسمه من الديوك اللي ماليه الشوارع .. ياه .. ده الرصيف
 من غيرك وحش بشكل ..
 ادمعيلي ربنا يخرجنا منها علي خير .. وموش هاوصيكي ..
 خللي بالك من العيال قوى .. وغطيهم بالكوفرتة اللي جايبها لك
 من آخر سفريه لبولاق ..
 بلاص
- (في المستوى الأعلى يقف أحد الرجال معترضاً ويشير الي ما
 يحدث أمام قفص الاتهام لزملاءه حيث يتم الحديث التالي) ..
 ده كلام ياساده .. الناس دي سايينها كده تتكلم براحتها جوه
 المحكمة .. صدق من قال : يبقى القانون مننا .. والحق حقنا
 .. وييجوا الصيع يقعدوا علي قلبنا .. عجبني ..
 هدى نفسك يا شريف بك .. هدى نفسك .. جرحك لسه جديد
 وعملية البواسير لسه طرية ..
 شريف
- والله يامنير بك هاتنقط من حال البلد دي .. (ثم وهو ينظر الي
 الثالث صبرى) .. ولا انت موش معايا يامتر ؟ ..
 انا مستني بس لما المخاكمة تبدأ .. وهاتشوف انا ها عمل ايه ..
 سيادتك أكيد سمعت الكلمة اللي بنتقال عني في المحاكم .. بص
 شوف صبرى بيعمل ايه .. هو انا محامي سهل ولا عمرى
 كسبت قضيه ..
 صبرى
- (في قلق) .. ايه ؟ ..
 قصدى أقول عمرى ما خسرت قضيه ..
 وعشان كده أنا وكلتك .. وعش لن كده انا دفعلك .. وعارف لو
 ماجبتليش حقي .. هارفع عليك قضية نفقه لي انا والمدام والأولاد
 .. لانك أخذت كل اللي حيلتنا من أول الأطيان والروزاريس لحد
 الكارته والشاليه اللي في مارينا ..
 شريف
- (صارخاً فجاه) .. محكمة .. حكمت المحكمة حضورياً ..
 (ثم يتدارك) .. لامواخذه دي اللي هايقولها القاضى .. محكمة
 (تدخل هيئه المحكمة وعلي وجوههم ألقعه لشخصيات شهيره :
 الجندى

القرصان ودر اكو لا ومهرج السيرك .. وكما يدخل ممثل الادعاء وهو بملابس الانسان الأول التقليديه وبيده العظمه الشهيره ويتجه هو الآخر الي مقعده .. ولتحديد الشخصيات فان در اكو لا هو القاضى والقرصان المستشار اليمين والمهرج مستشار اليسار)

ياللا .. فتحنا الجلسة وعاوزين نشوف دم .. الادعاء جاهز ؟

جاهز ومضببط نفسى وكله في السليم ..

محامي العالم النكد موجود ؟ ..

موجود ياسياده القاضى ..

محامي الناس الغلابه موجود ؟ ..

محسوبك ياباشا موجود ..

خش علي الشغل بسرعه .. علشان انا والزملا مستعجلين (وهو

يشير لممثل الادعاء) ..

سياده القاضى .. حضرات المستشارين .. انه في اليوم الأول

من محرم الموافق

(في ضيق) .. انت هتحكيلى قصه ؟ .. بقولك مستعجلين ..

(في استماله للقاضى) .. عفوا سيدي القاضى .. انه في اليوم

الأول من محرم

هايرجع بقوللي تاني الموافق .. ايه رأيك بقي اني انا مش موافق

علي الرغي ده .. خلص ..

انه في يوم من الايام

(محذراً) .. ها ..

كان لي قلب ياباشا .. مافيهاش حاجه ..

علي النعمه أحبسك .. وده آخر تحذير ليك .. خش عدل في

الموضوع ..

في هذا اليوم المنيل اللي جنابك متضايق منه .. تناولت يد هذا

المجرم المائل امام حضراتكم كأنه قطه .. للعبث والتزوير في

أوراق رسميه .. لقد أنجب هذا المجرم ولدا وتوجه به الي مكتب

صرف الأسماء للمنحطين من أمثاله .. فأعطي له أسم خيشه

ليكون أسم الطفل خيشه بلاص ابن زلعه ابن ماجور المدالج ..

لكن المجرم لم يرضى بشرعية هذا الاسم وتوجه ليلا جلسه الي

مكتب صرف الأسماء للمرتاحين بحثاً عن اسم يلطشه .. ويشاء

القدر أن تطال يده اسم شريف بك ياساده .. شريف بك رجل

المال والأعمال والدولار .. وها هو يزور في الأوراق الرسميه

ليغير اسم ابنه خيشه الي شريف .. بل وشرع أيضاً بتفكيره الدنيئ

أن يغير اسمه كذلك ليضمن لابنه المفعوص مستقبل بالتعلم

والحصول علي مؤهل .. وهذا لا ينسجم نهائى ولا بصحة لمثل

القاضى

الادعاء

القاضى

محامي ا

القاضى

صبرى

القاضى

الادعاء

القاضى

الادعاء

القاضى

الادعاء

القاضى

الادعاء

القاضى

الادعاء

هؤلاء الحثالة من المجرمين .. عمرها ما حصلت .. عمرها ..
 (وبعد كلمات الاستنكار من المستوى الأعلى وحركات
 تقززهم) .. سادتي .. إن الجريمة ليس لها حدود كما تعلمون
 .. فالذى يسرق البيضه يسرق الفرخه .. ولا يعيقه حتى
 أنفلوتزا الطيور .. موش مهم .. لقد حاول السيد شريف المجني
 عليه ان يستعيد اسمه بكافة الطرق والوسائل السلميه .. لكن
 المجرم ابي .. ابي وطنش .. وهذا أنيل ما في الموضوع ..
 ابي أن يعيد الأسم المسروق أو أن يرضع ابنه بوليس نجده لاجل
 ما يموت وتنتهي المشكله .. هل هذا عدل ؟ .. أليس هناك
 قانون يحمي الاسماء والعائلات ؟ .. إنني أطلب بتوقيع أقصى
 العقوبه علي المتهم .. انشالله يموت ألف مره .. برضه موش
 هايشفي غليلي .. أنا بصراحه عاوز جنازه وأشبع فيها لطم ..
 عايز أرتاح لانني تعبان .. تعبان وحاسس ان نفسي غمه علي ..
 علماً بإنني متجاوز من اسبوعين .. (يتمالك نفسه) .. سادتي
 .. عليكم بإنقاذ الناس الغلابه من يد المفترين .. فما ذنب
 الأجيال القادمه من المرتاحين حين تنتهي الأسماء المحترمه
 بالسرقة والتدليس ولا يجدوا أمامهم غير أسماء قدره مثل بعبع
 وشلضم وبلاص وقدره وما شابه من العاهات ؟ .. ما ذنبهم ؟
 (للإدعاء) .. انت بتجيب سيرتي ليه يا جدد انت ؟ ..

شلضم

القاضي

شلضم

القاضي

شلضم

القاضي

شلضم

القاضي

مين اللي اتكلم ؟ ..
 أنا ياسياده القاضي ..
 انت مين ؟ ..
 انا شلضم هلضم المكلم ..
 شلضم هلضم المكلم ! .. إسمك عار ..
 عار ليه يابك ؟ ..
 وهاحبسك عشر سنين لانك فتحت بقك بدون اذن .. خده
 يا عسكرى ..

شلضم

برى يا عالم .. برى يا خلق .. برى ربنا يهدكم ..
 (الجندي يتقدم ويدفع شلضم الي الخارج حيث يسود الهدوء
 المسرح نسبياً ثم يدخل الجندي وهو يتفرض يداه) ..
 وديته جنب التابوت بتاعي علشان أسهر أمزم فيه ؟ ..
 طبعاً ياباشا .. (ثم جانباً) .. ده احنا لو ماوردناش العشا
 ليلاتي هاييجي علينا الدور ..

القاضي

الجندي

محامي المجني عليه يقوم يحامي ..
 (وهو يتقدم نحو هيئة المحكمه ويحمل ورقة كبيره جداً ليقرأ
 منها وصارخاً) .. غير مجد في ملتتي واعتقادي .. نوح باك
 ولا ترنم شادي .. وشبيه صوت النعي اذا قيس بصوت البشير

القاضي

صبرى

في كل نادى ..

نادى ايه ؟ ..

القاضى

صبرى

اللى يعجب سيادتك .. ولو اني أحبذ النادى اللي عظمتك بتشجعه
 .. بهذا ياسيدى القاضى وصحبته .. أفتتح بمشيئة الله دفاعنا في
 هذه الواقعة .. إنني هنا لا أدافع فقط عن السيد شريف الأصلي
 .. بل أدافع عن كل الغلابه .. ان السيد شريف الأصلي هو
 الأصلي .. وحاكم أصلي وفصلي كلهم من بعض خيركم وانتوا
 عارفين ..

إختصر ..

القاضى

صبرى

ان موكلي ياساده من الناس التمام قوى .. عنده بدل البدله خمسين
 .. وبدل القميص ستين .. وربنا يديله كمان وكمان .. المهم
 سأقص علي عدالتكم القضيه وانتوا بقى تشوفوا وتحكموا بمزاجكم
 .. (ثم وهو يركض في دائرة حول نفسه كما لعبه الأطفال في
 حدوته التعلب) .. يحكي أن .. أن ايه .. أن شريف ..
 شريف البيه .. نايم ليله ولا عليه .. كله بلاص .. وأكله في
 ايه .. أكله في اسمه الطمعان فيه وإداه لابنه يعليه بيه .. لاجل
 يخش لاسيه فرنسيه .. زعق نادى الناس حواليه .. عشره ما
 جابوا موثور رجليه .. شفت الإسم وسك عليه .. جم يقولوا ياعم
 فيه ايه ؟ .. قال ده لخيشه ونفسي فيه .. واذا كنتوا فهمتوا
 هاتعملوا ايه ؟ .. (ثم وهو يلطم خديه أخيراً) .. أحيه ..
 أحيه ..

(قبل أن يعقب أحد) .. اللي هايتكلم هالبسه قضيه ..

ماشى لغاية كده ..

ماشى ..

هو ده اللي حصل ..

ايه بقى اللي حصل ؟ ..

القاضى

صبرى

القاضى

صبرى

القاضى

صبرى

(يغير لهجته خوفاً من القاضى) .. انا باقول لحضرتك ان
 موكلي السيد شريف الأصلي مايقدرش يصرف إسم بدل فاقد الا
 لما اللي سرق اسمه يموت .. فاذا كان المتهم بلاص ابن زلعه
 ابن ماجور المدالج ناوى علي خير .. مافيش مانع يحذف نفسه
 في فرن ولا في بحر ويخلصنا ..

طيب واحنا تبقي فايدتنا ايه .. (الي المحامي ١) .. الدفاع عن

المتهم .. (ثم محذراً له) .. من غير يحكي أن ..

(وهو يقف مذعوراً ويتقدم صوب القاضى في محاوله ان يهمس

في أذنه بشئ) .. لا من غير .. بس فيه حاجه كده ..

مافيش داعي للشرح .. المحكمه عارفه كل حاجه ..

يعني حضرتك فاهم وضعي وفاهم اني بادافع عنه غصب عني ..

القاضى

لمحامي

القاضى

لمحامي

مسأله إجراءات طلوعوا لنا فيها بتوع حقوق الانسان .. قول ..
(فرحا) .. يعني مفيش أى ضرر علي ..
لا مافيش ..

القاضى
المحامى
القاضى
المحامى

حيث كده نبدأ نتحامي .. أقدملكم نفسى .. أنا نبيل نبيل النبلاوى ..
من نبلاء كفر النبائيل .. وجارنا عدل جميل بك جميل
الجملاوى .. من جملاء كفر الجماميل .. احنا ياسياده القاضى
مشبحين في البلد وواصلين لكل حاجه تيجي علي بالك .. وده
ماجاش من فراغ .. احنا صحيح جدنا السابح كان اسمه المقشف
.. لكن لوش واجتهد وجاب فلوس ماتعرفش منين ودفعها لمكتب
صرف أسامي المرتاحين وأخذ اسم النبلاوى .. ومن خوفه عليه
لا يتسرق دقه علي دراعه اليمين ودراعاه الشمال .. أمى
بتحكيلي ان الاسم ده كلفه أيام الرخص خمسين جنيه .. جنيه
يعشق جنيه .. باختصار .. أنا نبيل نبيل النبلاوى من نبلاء كفر
النبائيل .. تخصص في المرافعه أمام محاكم النط علي الأسماء
.. ومحاكم نتش الألقاب .. ومقدم طلب عشان ياخدوني في
محاكم التعدى علي قسط المحترمين .. عمليه ماهياش سهله ..
عموماً مش هاطول عليكم وأبدأ مرافعتي .. لقد عهد إلي بأن
أكون محامى هذا المجرم .. (يشير الي بلاص الذى بيدي بيده
حركة للتوعد) .. إنني أطالب بالحماية منه حتي أستطيع أن
أكمل ما اصطلح عليه من سيادتكم بإجراءات حموم الانسان ..

حموم الانسان ؟ .. ياللا أهه نضافه قيل ما يتاكل .. كمل ..
أى كلمه أونطه هاتقولها .. هاقولهم اللي عندى ..
ايه اللي عندك ياخويا ؟ ..

القاضى
بلاص
المحامى
بلاص

عندى حكاية العشر تلاف جنيه .. بأماره ما أنا مجرم ومنحط
وواطى وأهلى كلهم دون ..

(وهو يعتدل في جلسته ويتجه بوجهه ناحية بلاص ويهز رأسه
في ابتسامه ثم عن اصطبياد شئ ما) .. انت قلت ايه ؟ ..
الكلام اللي قاله علي وعلى أهلى ..

القاضى
بلاص
القاضى

الكلام موش مهم .. كلنا بنتشتم .. انا عاوز اعرف ايه حكاية
العشر تلاف جنيه دول ؟ ..

قاللي انه عاوز عشر تلاف جنيه نظير انه يرشهم عليكم عشان
تدوني البراءه .. ولما قلت له اسلمهم أنا بايدي لعضمتكم رفض
وقعد يشتم في ..

بلاص
القاضى
بلاص

ماهو لازم يشتمك ويلعن سنسفيك ..
عشان فهمت انها لعبه وحب يلطخ بيها أساميكو ؟ ..
لا .. عشان انت حمار ومشيت في السكه الغلط .. ونسيت ان
القضاء سيد قراره ..

القاضى
بلاص
القاضى

جائيله تماماً ٠٠ أنا من الصبح نفسى أفهم القضية دى إيه ٠٠
وأساسها إيه ٠٠ موش لاقى حد يدلني ٠٠ (ثم لبلاص) ٠٠ هي
المشكلة ايه يا أخ ؟ ٠٠

المشكلة بيقولوا إني سرقت من البك اسمه ٠٠ (يشير الي شريف)
(في دهشه) ٠٠ معقول !! ٠٠ (ثم للمحامي) ٠٠ وانت هنا
ليه؟

بلاص
المهرج

المحكمة معيناني أدافع عن المتهم ٠٠
وليه مش عاوز تكمل مرافعتك ؟ ٠٠
هاتاكل ياباشا ٠٠ هاتاكل ٠٠

المحامي
المهرج
المحامي

(للقاضى) ٠٠ إيه رأى سعادتك نأجل مسأله أكله الليله دى لحد
ما يترافع ٠٠ علي الأقل نبقي مشينا الناحيه الشكليه للمحاكمه ٠٠
ماجراش حاجه ٠٠ الفجر لسه بدرى عليه ٠٠ (للمحامي) ٠٠
كمل مرافعتك أدينا قاعدين ٠٠

القاضى

(المحامي يعود الي حيث كان يقف أمام القاضى وهو ينظر
لبلاص في توعده في الوقت الذى ينظر فيه بلاص له في سخريه
المنتصر) ٠٠

كله منك ٠٠ كله منك ٠٠ الزنقه اللي زنقتهاالي دى لازم يكون لها
حل ٠٠ أنا بقي محامي لعبتى الكلام وهأوريك ٠٠ اسمع بقي البق
ده ٠٠ (ثم للقاضى) ٠٠ سيدى القاضى ٠٠ حضرات
المستشارين ٠٠ هناك جريمه أكيد ٠٠ وهناك متهم ومجني عليه
أكيد الأكيد ٠٠ وهناك دليل وشهود أكيد الأكيد الأكيد ٠٠
الموضوع دلوقت بيتلخص في كلمتين اتنين ٠٠ الراجل ده (يشير
الي بلاص) ٠٠ لهف أسم الراجل ده ٠٠ (يشير الي شريف)
٠٠ فالراجل ده ٠٠ (يشير الي شريف) ٠٠ زعلان من الراجل
ده ٠٠ (يشير الي بلاص) ٠٠ لذلك فان الراجل ده ٠٠ (يشير
الي بلاص) ٠٠ موضوعه أصبح مع الراجل ده ٠٠ (يشير الي
شريف) ٠٠ ولأن الراجل ده ٠٠ (يشير الي شريف) ٠٠ هو
الوحيد اللي أضر من اللي عمله الراجل ده ٠٠ (يشير الي
بلاص) ٠٠ يبقى الراجل ده ٠٠ (يشير الي شريف) ٠٠ يحل
مشكلته مع الراجل ده ٠٠ (يشير الي بلاص) ٠٠ وعليه فان
الموضوع بالنسبه لنا كلنا منتهى ٠٠ وعلي رأى المثل شيل ده من
ده يرتاح ده عن ده ٠٠ وربنا يديكم الصحه ٠٠ وكل عام وأنتم
بخير ٠٠

المحامي

(للمحامي في غيظ شديد) ٠٠ ايه الكلام الفارغ اللي عمال تقوله
يابني آدم ؟ ٠٠ (ثم للقاضى) ٠٠ ياسياده القاضى أنا باطالب
بدخول الراجل ده ٠٠ (يشير الي المحامي) ٠٠ مكان الراجل ده
٠٠ (يشير الي بلاص) ٠٠ لان الراجل ده ٠٠ (يشير الي

المدعي

(المحامي) .. لا قدر يفهم الراجل ده .. (يشير للقرصان) ..
 ولا الراجل ده .. (يشير للمهرج) .. ولا الراجل ده ..
 (يشير للقاضي) .. ولا الراجل ده .. (مشيراً لنفسه في
 النهاية) ..

(فرحاً) .. يحيا العدل ..

بلاص

(للقاضي) .. سكتوا المجرم ده ..

المدعي

(للمدعي) .. خف علي لأبسك نصيبه انت كمان .. خف ..

بلاص

(وهو ينظر هنا وهناك) .. ياه .. هي المحكمة ضلمت كده ليه

القاضي

.. انا تعبت .. الشمس قربت تطلع وعايز أخش التابوت

وأتعشى قبل ما انام .. أى واحد فيكم هايتكلم بيبقي هو العشا

بتاعي .. الراجل فيكم يفتح بقه ..

جرى ايه ياعم القاضي .. هو احنا فين ؟ .. في مدرسه ..

أم خيشه

ماتسبب اللي يتكلم يتكلم .. (ثم وهي تشير الي المدعي) .. ما

الراجل ..

(مقاطعاً) .. باينها ليله موش فايته الليله دى .. هاتقولي هي

القاضي

كمان ده ..

موش هاقولها .. لكن هاقول انه بسلامته من ساعه ما دخلنا وهو

أم خيشه

حاطط نقره من نقر جوزى .. زى ما يكون جوز أمه .. ولا

التاني .. (تشير الي محامي شريف) .. هو كمان مستعصب

قوى عليه .. حتي اللي انتم جايينيه يدافع عنه هو كمان حاطط

بلاص علي دماغه وزاعق .. هي ايه العبارة ؟ .. ظلم ده ولا

موش ظلم .. دى حاجه تجنن دى ..

حد أذنك تتكلمي ؟ ..

القاضي

انت مش هددت الرجاله وقلت مايفتحوش بقهم .. يبقي النسوان

أم خيشه

بقي تتكلم وتقول ..

فين النسوان دى ؟ ..

القاضي

موش شايفهم ؟ ..

أم خيشه

باقولك فين ؟ ..

القاضي

(الذى يتحدث بلهجه وطريقه أمراه لعوب بعد ضحكه) .. بص

ببيع

هنا ياسيادة القاضي ..

(لبيع) انت ست ؟ ..

القاضي

خدامتك .. واسمي ببيع ..

بيع

(المهرج يضحك كثيراً حتي انه يضرب القاضي بكفه في مزاح

بالغ ليستحته علي الضحك) ..

فيه ايه ياحضرة المستشار .. مالك ؟ ..

القاضي

يوه كنتك ايه ياببيع ..

المهرج

(بطريقة ريبه) هو ببيع ده ..

القاضي

- المهرج
كان معايا زمان بنسرح في الموالد .. بس انا وقعت في ايدي كام
محفظه معكمه كده وعديت .. وهو لسه محلك سر .. ماقدرش
يجيب فلوس بدرى ويشتريله اسم ويبقي أفندى زينا ..
وده اللي خلاه قلب ؟ ..
- القاضى
المهرج
موش عارف .. بس الغريبه انها مازالت محفظه باسم ذكر ..
بعبع ..
- بعبع
(للمهرج والمحكمه تضحج بالضحك) .. مالقاش معاك خمسين
جنيه عشان نسيت الفيزا كارت في البيت ..
خمسين جنيه مره واحده .. ليه ؟ ..
أشترى هه ..
هه ؟ ..
- المهرج
بعبع
عشان ازودها علي الاسم اللي معايا ويبقي بعبعه ..
ده احنا ولا اللي بقينا في شارع الهرم .. اسمع ياببع انت ..
- القاضى
بعبع
عيني ياحضرة القاضى ..
عاوز ودنك موش عينك .. نظير الدوشه اللي عملتها في
المحكمه دى .. انت محبوس لحد ما تموت أو تتوفي أيهما أقرب
أقول اللي في نفسى بقي قبل ما أموت ..
- المهرج
بعبع
قول ياببع ياجميل ..
(للمهرج) .. قول للراجل ده .. (يشير نحو القاضى) ..
يفرج عن الراجل ده .. (يشير لبلاص) .. يفرج عنه قوى
اشمعني ..
- المهرج
بعبع
بحبه ومفيش داعي للإحراج .. مراته واقفه ..
(بلهجة عتاب) .. ده كلام بالذمه ياببع .. هو بلاص يغلي
أم خيشه عليك .. انت تحبه .. أنا أحبه .. بلاص بلاصنا كلنا ..
- بعبع
أم خيشه حيث كده خدى راحتك المحكمه بتاعتي .. (يشير للمهرج) ..
ياعداله القاضى .. هو حرام ان الواحد يبقي عاوز ابنه يكون
أحسن منه ؟ .. بزمك انت موش عاوز ابنك يكون أحسن منك ؟
القاضى (باستهجان) .. يطلع قاضى يعني وأنا أبقي حنة محامي واقف
قدامه .. لأ طبعاً ..
- أم خيشه (في انفعال) .. ياسيدى انشالله يطلع سباك .. المهم انه يركب
الحنفيه أحسن منك والسلام ..
ده كمان لأ ..
- القاضى
أم خيشه ما علينا .. أنا جوزى حب يطلع ابنه أحسن منه .. تيجي ازاي؟
القاضى ازاي ؟ ..
- أم خيشه من حال المبتدى احنا ماحلتناش أى حاجه نتسند عليها ..
بلاص خشى في المرافعه يأم خيشه ماتضيعيش وقت ..
أم خيشه سيدى القاضى واللى جنبك دول .. هل يمكن ان يكون لهذا الطفل

الأعزل مستقبل في ظل اسم خيشه ؟ لا بالطبع .. وذلك
لسيطره القوانين التي لا تتيح لتلك الشرذمه من البشر أن تجد لها
مكان تحت الشمس .. فكان لا بد من إحداث تغيير جذري
وجوهري كي تتناسب الأسماء مع التطلعات .. حتي لو أدى ذلك
لتغيير القوانين ان لم يكن كل مواد الدستور ..

(بطريقة الهمس للقاضي) .. الست دي بتتكلم في السياسة ..
قيد عندك ..

المدعي

هناك فارق كبير ياسيدى بين السياسة والقوانين الوضعيه ..
السياسه هي اللي تضع القوانين ..

لم خيشه

المدعي

عليك بمراجعة السنهوري ومؤلفاته .. فقد تنجلي الأمور أمامك
.. وان ماانجلتش إدعكها بليفه سلك ..

لم خيشه

أحتج ..

المدعي

سيب الست تتكلم ..

المهرج

الكلام ده انا سمعته في السيمبا .. فيلم ايه موش فاكر .. تقريباً
الأكتع والسيف ..

القرصان

(لأم خيشه) .. كلمي كلامك وخلصينا ..

القاضي

وحسبي في الدلاله علي رؤيتي الموضوعيه للأمور .. ان اللص
في كثير من الأحيان قد تكون بداية لصوصيته هي الحاجه ..
والحاجه أم الأختراع .. لكن هل يمكن للمدعو بلاص ان يخترع
إسماً غير الذي صرف له بقوة القاتون .. علماً بأن الأسماء
موجوده كوجود الشمس والهواء .. الأسماء تملئ العالم ياساده
.. اذا فليس هناك ما يدعو الي التفريق بها بين من يملك
بالمنصب والجاه ومن لا يملك حتي قوت يومه .. وهذا ما دعي
المدعو بلاص أن يقتبس إسماً لابنه لقناعته بتلك الفكره .. فليس
هناك حرج في أن يقتبس أى اسم حتي لو كان للسيد شريف لا
حرج .. وسؤالي الآن للسيد شريف .. (ثم وهي تتوجه
بالسؤال الي شريف) .. هل اسمك في الواقع يعتبر اسم علي
مسمي ؟ .. أم أنه اسم مستعار ومقتبس أيضاً تغطي به أفعالك
المريبه في دنيا المال والاعمال .. والشاهد علي ذلك بنوك بلاد
بره اللي مسلك فيها القرشينات .. دولارات .. دولارات ..
دولارات ..

لم خيشه

(في تحدى) .. أنا أحتج .. (ثم للمحامي الذي ينظر الي أم
خيشه في انبهار) .. ما تتكلم ياخويا ولا انا جايبك عياقه ؟ ..

شريف

تصدق يابيه اني مكيف من اللي باسمعه ..

صبرى

مكيف ؟ ..

شريف

الولايه بتقول كلام زى الفل .. إطلع من نافوخي الساعه دي
خلليني أتعلم .. (ثم الي أم خيشه) .. ايه اللي بتقوليه ده ياست

صبرى

- يا عظمه علي عظمه علي عظمه ••
 وصلنا للعظمه يا عدالة المحكمة ••
 وفي ختام مراقبتي المتواضعة فإني أطلب لموكلي •• جوزي
 الللي بيأكلني وبيكسيني وشقيان علي وعلى عياله •• أطلب له
 البراءه •• وأوعدكم ماعدناش نبص لفوق •• لان الللي ببص
 لفوق بيلاقي أشكالكم ودي أكبر نصيبه •• (تبكي) ••
 (فجاه) •• محكمة ••
 (القاعة كلها في صمت وترقب لشئ ما والقاضي بنفسه ينظر
 حوله بحثاً عن دخول أحد كما يحدث في دخول هيئة القضاء) ••
 فيه ايه يا عسكري ؟ ••
 ابدأ يا حضرة القاضي ••
 أمال مالك طلعت كده زى البتاع وقلت •• (يقلده) •• محكمة ••
 موش عارف •• جت معايا كده ••
 طيب •• نظراً لأنك خضيت المحكمة •• فقد قررنا عزلك من
 عسكري لجندى وابقى شوف مين هيعبرك ••
 أبوس ايدك يابك •• بلاش جندى دى •• كل الشباب بيجندهم
 والخوف لا يجندوني من أول وجديد ••
 (غير مبالياً) •• المدعي عاوز يقول حاجه ؟ ••
 أيوه •• (ثم بصوت هامس) •• أي قى نص جنبيه سلف لإني
 اتقشطت ••
 انا موش عارف ازاي ده يحصل واحنا جوه المحكمة ؟ ••
 (المدعي ينظر له نظره ذات مغزى) •• الزملا بالذات أنا
 ماباجيش جنبيهم خالص ••
 (للقرصان) •• علي بابا •• المهم دلوقت عاوزين نقول الحكم
 عشان كل واحد يروح لحاله •• (ثم للجندى) •• اتعصب باللا
 وقولها ••
 (في عصبية) •• محكمة ••
 حكمت المحكمة حضورياً باعدام المدعوق بلاص ابن زلعه ابن
 ماجور المدألج •• وتغريمه وتغريم ورثته بكل أتعاب القضييه بما
 فيها النص جنبيه السلف الللي هاندفعه للكروديا •• وتعويض مالي
 قدره حوالي حاجه كتيره كده تسدد ديون البلد الللي اتقشطت هي
 التانيه يوم ورا يوم ••
 (صارخه) •• بلاص ••
 ماتخافيش يأم خيشه •• مشوار صغير وراجلك •• أبقى
 حضريلي أكله حرشه •• وورق الجرايد الللي هانسد بيه الشبايبك
 •• بس بقولك ايه •• الجرايد تكون بالعربي علشان لو كان لي
 عمر بعديها أبقى اقراها •• ولو ماكنلش •• ابقى غطيني بيها

المدعي
أم خيشه

الجندى

القاضي

الجندى

القاضي

الجندى

القاضي

الجندى

القاضي

المدعي

القاضي

القرصان

القاضي

الجندى

القاضي

أم خيشه

بلاص

- وصوتي ..
 محكمه ..
 الجندي
 ببع
 الجنازه هاتكون ابهه يابلص ماتقلش .. كلها غلابه وشحاتين
 وأمن مركزي فوق البيعه ..
 أمن مركزي فوق البيعه !! ..
 القاضي
 بلاص
 الله .. موش هاتحسب مظاهره برضه ياعم القاضي .. (ثم
 لبيع) .. خللي بالك من العيال وامهم ياببع .. وشلضم كمان
 هو فين ؟ ..
 شلضم
 (والذى يفاجأ بوجوده في الخلف) .. موجود يابلص وقاعد
 أيد كل حاجه ..
 ببع
 الجندي
 يحلاوة الصحبه الحلوه اللي لا يمكن تتعوض أبداً ياجدعان ..
 محكمه ..
 شريف
 أخيراً كسبنا القضية ..
 صبرى
 كسبنا القضية دى حكايه .. لكن انا عاوز أتعايب الخمسه مليون
 جنيه ..
 شريف
 عنيه ليك .. أول مااطمن اني هافك من البلد أنا كمان .. فلوسك
 هاتكون علي الجزمه ..
 الجندي
 محكمه ..
 المهرج
 القاضي
 (للقاضي) .. انت خلاص حكمت صحيح ؟ ..
 (في دهشه) .. حكمت صحيح !! .. هو الكلام مش كان
 قدامك ياابني ؟ ..
 القرصان
 القاضي
 المهرج
 الكلام كان قدامنا أه .. لكن احنا لينا رأى ثاني غير كده ..
 اذا متفقين .. عمر الاختلاف في رأى ما فسد للود قضيه ..
 لأ فسد .. ولازم القضيه دى تتعاد من اول وجديد .. وكل واحد
 فينا يقول رأيه بصراحه ..
 المحامي
 المهرج
 القاضي
 (للقاضي) .. سياده القاضي .. احنا كده هانتسوح ..
 التسويح يعم يامحامي التكد ..
 أنا أصدرت حكمي خلاص .. اللي زعلان من حاجه يجي يقابلني
 علي بكره عند التابوت ..
 القرصان
 القاضي
 بس انا بكره فيه شغلانه كده مربوط عليها ..
 موش لازم بكره .. السنه الجايه ياسيدى .. البلد مليانه بني
 آدميين .. بناقص ..
 الجندي
 أم خيشه
 القاضي
 محكمه ..
 ياحضرة القاضي ..
 يانعم ..
 أم خيشه
 القاضي
 خيشه مين هايربيه بعد أبوه ما ينعدم ؟ ..
 هو أول واحد هايتربي .. الأيام والأرصفه مدارسها كثير ..

- والدولة مشكوره عمرها ما بتمانع أبداً علي فتحها . . .
- البك القاضي كلامه مطبوط . . . ودي خيشه يسرح في الهرم . . . بلاص
- ويكده يبقي نابنا حاجه من مدارس الدوله . . . ويتعلم لغات . . .
- (صارخاً) . . . محكمه . . . الجندى
- (فجأه الكل يتجمد مكانه كالتماثيل عدا بلاص الذي يخرج من القفص ويتفحصهم في دهشه) . . .
- نمتوا . . . هي الحكاية كانت حلم . . . ولا الحلم كان حكاية . . . بلاص
- منعول أبو ده حلم . . . حلم غبي قذر زي ما قال الافندي المحامي اللي المحكمه معيناه . . . بس الحلم ده كثير بيحصل . . . بيحصل لكن في صوره ثانيه . . . صورة لازم نصحي لها لبعدين تروح علينا نومه والغلابه كالعادة تتاخذ في الرجلين . . . المساله ياخواننا حالياً واقفه عند كلمه لو . . . لو الحلم ده حصل بالفعل . . . هايجري ايه ؟ . . . (ثم وهو يغير لهجته) . . . طيب نقولها بشكل ثاني متهيألي تعرفوه . . . لو الأسامي كانت بفلوس . . . كان الفقير سمي ابنه ايه ؟ . . . (ثم لحظة صمت لسماع الجمهور) . . . لا جاموس . . . الجاموس رغم انه حيوان مسكين مالوش مطالب . . . لكن بيفيد . . . يوم ناخذ منه اللبن . . . ويوم ناخذ منه اللحمه . . . وباقى الايام بنغمي عنيه لاجل ما يفضل يجر في ساقيه عمرها أبداً ما هاتقف طول ما فيه المفيد والمستفيد . . . (ثم وهو يشير لهينه المحكمه النائمه) . . . ياريت تقلقوهم علشان يصحوا والعرض يخلص وتروحوا . . . (ثم وهو يستعد للتصفيق بكلتا يديه) . . . باللا . . .

تضاء الصاله بكاملها لنهاية العرض

ممدوح فهمي ؟؟؟